

Lombo: Bible for Luka  
Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



# Luka

## 1

<sup>1</sup>Baito likam baosila okota oemalisa bombila loka lo mbeko yeke itomoaka loka liso, <sup>2</sup>kee beke bakaenaka ta baiso bibo oakola ta liako, beke bakasona bakeleli ba lioi, bakafesu yo. <sup>3</sup>Kolaongoma, Teofili, butu a lokuku, mbisa yange iyolinga linga litina li ye mbeko itotina, ei aleko lokaenyela mbo losonelowe loksa loka loyamo itotina. <sup>4</sup>Kolaongoma otolombela lamba mbeko ikaekisomo lao imbe omongo wewe. <sup>5</sup>Tambile eya Elode bokata bo Yuda, imbaka la kanga emoi, lina linde mbo Yekalia, buto a kalasi eya Abia. Boali inde ambaka buto a bofindi boya Alona, lina linde mbo Elisabeta. Bo abaele bambaka baangani ta baiso baya Mungu, bambaka batokenda la tokpelo la tokela toya Ngene ndoena bobo. <sup>6</sup>Baitimba la wana loka mbo Elisabeta ambaka bokomba; la bo atotina bambaka batolo. <sup>7</sup>Lisiyo limoi ta lisangi li kalasi inde, Yekalia ambaka atokela likua linde li kanga felo iya Mungu, <sup>8</sup>ta bofono bo bokanga, la ikaenganela ye mbo aote ta eseke lotanu loya Ngene otumba bobele bo liesa. <sup>9</sup>Likama li baito limbaka lousa batosembola ta mbile oetumba bobele bo liesa. <sup>10</sup>Bokitomo boya Ngene akaenamana linde ta etumbelo lo bobele ta boo bolome. <sup>11</sup>Ekaenaka Yekalia ongoma, kabanga la bowa bokaotela ye. <sup>12</sup>Ndjo Bokitomo akabeka linde mbo, oibangaka, Yekalia, loka mbo liseboli liao lifokana, la boali ao Elisabeta atobotelo we wanabotolome, la otota ye la lina mbo Yoani. <sup>13</sup>Liomali la limengo lifi litomba lao, la baito likama batooka limengo ta libotomu linde. <sup>14</sup>Loka mbo atomba butu bofi ta baiso baya Ngene, aitomwa baana, lamba leka lo lewisa; la atowala la Bolimo Botanu kota solo eya inango inde. <sup>15</sup>Atobinoisa baito ba Isalaele likama ambe Ngene Mungu ibo. <sup>16</sup>Ye aleko atoka felo inde la bolimo la bofoka boya Eliya. Atobinoisa betema be ba ise ambe bana, la baito ba tale ta ndole e liengani, loka lokomanyela Ngene bofindi boengani. <sup>17</sup>Yekalioa akabeka la Bokitomo mbo, loto lembela yeke isani? loka mbo loomba botolo, la boali ange aleko amba inunu. <sup>18</sup>Bokitomo akabinoisa bonoko mbo, Ei Gabaliele, ono atoemala felo iya Mungu, la lotomomo oya beka lao la otondolelo we ye mbeko. <sup>19</sup>Ndjo ko kanikani otomba ebebe, oito beka kota lisiyo lieke litotomoa ye mbeko, loka oikaimila baai bange, beke batotengana ta elaka lamo. <sup>20</sup>Baito baumba kela Yekalia la bakamwala mbo aokolo ta eseke lotanu, <sup>21</sup>Ndjo oko etomoaka ye aikaluwa obekana libo, la baka lembela mbo aene lienesi ta eseke lotanu. Ye aleko aka mbaka atofefia bo ndembe ndjo akatikala ebebe. <sup>22</sup>Oko esilaka basiyu binde balikuwa, akaka ta mbele inde. <sup>23</sup>Mbisa i basiyu be boali inde Elisabeta akanya lieme, la akaisa tengai liondo. Akabeka mbo, <sup>24</sup>Ngene aosila okeleleli ani ta basiyu be, oko akamoilekei, loka lofoya soni yange ta baito. <sup>25</sup>Ta tengai eliambe, bokitimo Gabaliele aka tomomo la Mungu oka ta boki bomoi bo Gallilai, la lina liko Nasaleta, <sup>26</sup>ambe boseka bomoi ono aitoka luwa botolome ta bopfindi boya Dawidi. Lina liya bolome mbo Yosefe, la lina liya botaali Malia. <sup>27</sup>Akaota elo embe ye, la akabeka mbo kalibo! botaali a ngbengbele, Ngene ambo lao. <sup>28</sup>Ndjo akabamba la bowa ta bonoko wamo, la akamba la toloi lamba kalibo amo ilangi obeka isai. <sup>29</sup>Bokitomo akabeka linde mbo, Ndo banga, Malia, loka mbo ofoanya ngbengbele ambe Mungu. <sup>30</sup>Tene, otoanya lieme, la otobota wana botolome, la otota ye lina mbo Yesu. <sup>31</sup>Ye atomba bofi la atotomo mbo wana aya ono Aeti likolo. Ngene Mungu atofa ye kiti ebokota eya Dawidi ise inde. <sup>32</sup>Atomba bokota ta mbele eya Yakobo omongo, la bokota winde boitomba la tunga. <sup>33</sup>Malia akabeka la bokitomo mbo, yeke itomba isai eke eitaka lalei la botolome? <sup>34</sup>Bokitomo aka binoisela ye mbo, Bolimo Botanu atoya liokolo liao, la bofoka boya Ono-Aeti likolo itoufo we. Yamo yoko wana botanu ono ato botomo atotomo wana aya Mungu. <sup>35</sup>Tene Elisabeta boboto wao, ye aleko afoanya lieme li wana botolome ta botoolo winde, la tengai ene embe tengai inde ee liambe ono atomoko mbo aitobota. <sup>36</sup>Loka mbo ambe Mungu mbeko itotina iyengani okelomo. <sup>37</sup>Maliya akabeka mbo, tene, ei bokowa boya Ngene, tikaka mbo ikomeleli kani ekaosila obekowe. La bokitomo akatika ye akaka. <sup>38</sup>Ta mbile amo Maliya akaemala la akaka mangu ta boki bomoi ta longo lo Yuda. <sup>39</sup>Akaota ta mbele eya Jekaliya, la akafa Elisabeta kalibo. <sup>40</sup>Ekaokaka Elisabeta kalibo eya Maliya, wana ta soolo inde akatila, la Elisabeta akawalisomo la Bolimo Botanu, <sup>41</sup>akamama la limiki lifi mbo, Owe ofoutchelomo ta bataali la wana ta solo ao afoutchelomo. <sup>42</sup>Loka loingi lobeko leke lo'otomoeleli mbo inango aya Ngene ange aoya ambei? <sup>43</sup>Tene, oko ekaokana limiki li kalibo ao katikati ta batoi bange, wana kati ee solo ange aotila la liomali. <sup>44</sup>Liomali ta botaali omo akaimilomo, loka mbo baai bakabeka Ngene inde bafonganisomo! <sup>45</sup>Maliya akabeka mbo, Liwawi liange liosimola Ngene, <sup>46</sup>bolimo wange bofo'omala la Mungu Bouwesi wange. <sup>47</sup>Loka mbo aomoila boeno bo lokuku boya bokowa winde, tene koakola kanikani befindi betotina batotangei mbo buto a limengo. <sup>48</sup>Loka mbo Ono aeti Bofi aokeleleli mbeko ifi fafo, la lina linde limbe botanu. <sup>49</sup>Ngandi inde imbe loka lo beke batobanga ye, befindi la befindi. <sup>50</sup>Ta boo winde akakela bofoka, aomelanisa baito beke bakaenyelisa baenyeli ba lofolo ta betema bibo, <sup>51</sup>la aofoya baito ba bofoka ta keka ee bokota, aikalilisa baito ba lokuku. <sup>52</sup>Aowalisa baito la semba ta biongo bilo, la aobinoisa baito ba lifoka baoo bule. <sup>53</sup>Aosunga Isalaele bokuwi winde, afoenyelisa ngandi inde, <sup>54</sup>(ani ebekaka ye la bangau biso) loka loya Abalayama la bofindi winde layalaya. <sup>55</sup>Malia akaumoa linde eseke lomoi lamba tengai isaso, la akabinoia ta mbele inde. <sup>56</sup>Lisangi liya Elisabeta obota wana likaengana, la akabota wana botolome. <sup>57</sup>Kendesani linde la befindi binde bakaoka mbo Ngene afokela ye ngandi fafo, la bakaomala linde. <sup>58</sup>Mbisa ibasiyo bonanei bakatena wana itombe, la bakakola ota ye mbo Yekalia, kee ani embe lina liya ise inde. <sup>59</sup>Ndjo inango inde akabinoisa bonoko mbo, tingalo, atotomo mbo Yoani. <sup>60</sup>Baka kelela ise inde ndembe lamba alangi ota wana la lini lina. <sup>61</sup>Akalengila lombao losonela, la akasona mbo lina linde mbo Yoani. <sup>62</sup>La bonoko winde la lolame linde bokalikoa la mangu, la akabeka, akasimola Mungu. <sup>63</sup>Bowa bokamba libo atotina beke bambaka onga, la mbeko yeke itotina imbaka bo bato beka ta boki bo longo loto tina lo Yuda. <sup>64</sup>Batotina beke bakao kaka yo bakaisa yo ta betema bibo, obeka mbo, kolaongoma, wana ono atoma ndai? Loka mbo wewe boo boya Ngene lombaka linde. <sup>65</sup>Yekalia ise inde aka walisomo la Bolimo Botanu, la akanagola mbo, <sup>66</sup>Ngene Mungu a Isalaele asimolo moko loka mbo aomoila

baiti binde la aokomanya liendolomu libo.<sup>69</sup> Aotomelesu bouwesi bofoka ta mbele eya Dawidi bokowa winde. <sup>70</sup>Kanda emoi ani ebekaka ye koala ta benoko be betondoli binde batanu mbo, <sup>71</sup>atouwise su ta beke batonanise su la ta bao ba baiyani biso batotina, la aleko mbo. <sup>72</sup>Atokela bakuwa ba ngandi ta bangau biso, la atoenyelisa liokamani linde litanu, <sup>73</sup>Ko lolapi leke atenaka ambe Abalayama ngau iso. <sup>74</sup>Mbo tofoyomo ta bofoka bo baiyani biso loka kembo tokuwele ye ndoena bowa. <sup>75</sup>La botanu la liengani felo inde bassiyi biso batotina. <sup>76</sup>Owe Wana, ombo tomoko bonangoli boya Ono Aeti likolo, loka kembo optoka felo iya Ngene okomanya ndole inde, <sup>77</sup>oluwisa baito binde loka lo liwisomu la lomesilomo lo bobo wibo. <sup>78</sup>Loka lo botema bo ngandi boya Mungu iso. La ngandi yamo, buse botondjele esu la bose, <sup>79</sup>Loka lo liangangi li beke bangali ta lotiyo, la katikati i lilima li lingba, la loka lokendisa bkolo biso ta ndole ekimia. <sup>80</sup>Wana akakonda, la akanya bofoka ta Bolimo, la akangala ta liombe tii kota lisiyo linde liyoenena ta Isalaele.

## 2

<sup>1</sup>Ta elo mbile, elo Kaisala Ogisito, akata ekela mbo baito batotina ba wenda basonomo baina ta kasa mbo batangomo loketi libo. <sup>2</sup>Lotangomo lo felo lotangomoko ani Kuliniuv ambe bokota bo yese iko Sulio, <sup>3</sup>batotina bakaka okasonomo baina, buto la buto la boki winde. <sup>4</sup>Yosefu aleko alilaka ta Galilaya, ta boki bo Nasaleta, loka bake ta Yudeya, ta boki boya Tawiti, bokumo Beteleyeme, loka ambaka buto a bofindi boya Tawiti. <sup>5</sup>Mbo ake okasonomo la Maliya baemo binde ono ambaka la lieme, <sup>6</sup>ta mbile embaka onga, mbile ee yelo lo'lobota loya Maliya lokaengana. <sup>7</sup>La akabota wana inde afelofelo botolome, akalingila ye la bolekan, akalalisa ye ta wato, loka elela loitimba ta mbele ee beenda. <sup>8</sup>Imbaka, la batchungani ba bekoko balalaka lousa ta bilanga lotiyo loka lo lomoilo bekoko. <sup>9</sup>La tene, bokitomo boya Ngene bokatomoela bo futuku, la liangangi liya Ngene likalingila bo. <sup>10</sup>Kola ongoma bokitomo akabeka libo mbo: Oibangakai; loka lo yele'nu mboli itanu, iyaii, ye itomba loka lo baito batotina; liomali lifi. <sup>11</sup>La boni, ta boki boya Tawiti, aobotomole'nu Bouwisi, Masiya, Ngene. <sup>12</sup>La tene ndembe ene etoluwise'nu: Otoanyai wainenge alingilomu la bolekan la alalisomu ta elelo lo nama. <sup>13</sup>Ta mbile ekabekaka bokitomo, futuku botuku bo bakitomo bokatomowa ta lobola ani bato simola Mungu, bo mbo: <sup>14</sup>Bofoka boya Mungu ta bilela bieti likolo, la kimia ta nyele aiteni ii baito bee aomali libo. <sup>15</sup>Ta mbile bakitomo bakafowa mbo bainowe ta lobola, batingani ba bekoko bakabeka amoi mbisa ii buto linde: Tokei teee kota Beteleme, la ye tokaena taye ikaya, yeke Ngene akaenise'su. <sup>16</sup>Bakaka mangu: La baka anya Maliya la Yosefu, la wana alali se ta elelo lo bekoko. <sup>17</sup>Mbisa ioen, bakasemowa itotina ye ikabekomoko loka lo wana oko. <sup>18</sup>Batotina beke baokaka bambakata limwali loka lo mbeko ye ibekaka batingani ba bekoko. <sup>19</sup>Maliya akakuka mbeko ye itotina ta botema. <sup>20</sup>La batingani ba bekoko bakainowa la liomali la ochwela Mungu beele ta itotina ye ikaena bo la ikaoka bo, la bakabeisa beke ba beisaka bo. <sup>21</sup>Basio bonanei, beke wana aenganisaka lotonemo itombe, bakaengana, bakafa ye lina mbo Yesu, lina lie bokitomo abekaka afaka ye felo mbo inango a'anye lieme. <sup>22</sup>La, mbile ee basiyo ba lia'anisomu likaenganisomo, kotutana la bikela biya Mose, Yosefu la Maliya bakatola ye ta Yelusaleme, mbo batike wana ambe Ngene. <sup>23</sup>Otutana la ye isonomu, ta bikela biya Ngene batolome batotina ba felofelo batofomo la Ngene. <sup>24</sup>La lifaafi li wana a ngombe, kee bana baele ba ekuku, ani esonomu yo ta bikela biya Ngene. <sup>25</sup>La tene, imbaka ta Yelusaleme, buto amoi akumo Simeona, buto oko ambaka buto botanu la liengani, Mungu abekaka mbo aitongba sakolo koane Bouwisi Masiya Yesu. <sup>26</sup>Abeisomoko la Bolomo boya Mungu mbo aimbongba ko aene Masiya Ngene. <sup>27</sup>Akandjomu la Bolimo ta esondjamelu. La, ani baboti binde batolab wana Yesu mbo baenganise tokpelo to ekela. <sup>28</sup>Akatola ye ta boo winde, akasimola Mungu ye mbo: <sup>29</sup>Kanikani, Ngene, tikaka bokowa wao mbo ake la kimia, kotutana la baoli bao. <sup>30</sup>Lokabaiso bange bafuena Bouwesi, <sup>31</sup>liuwisi lie likakomio mbo liuwisa baito batotina. <sup>32</sup>Liangangi mbo liangange ta yese itotina, la liangangi li Isalaele, baito bao. <sup>33</sup>Ise inde la inango bambaka ta limwali ani etobeka bo linde yo mbeko. <sup>34</sup>Simeona akautcha ye, la akabeka la Maliya inango: Tene wana ono ambe botchakolomu mbo aesi lokpeso, la loemaliso baito babule ba Isalaele. <sup>35</sup>La ambowe angene: Akpaka atotoba botema wao, mbo baenyeli ba baito babule la betema beuwe. <sup>36</sup>Imbaka aleko la botondoli amoi, Ana, boseka aya Penule, ta bofindi boya Azele, ambaka botoolo la miaka br bule, auwaka la bolome inde miaka bosambale, kota boseka winde. <sup>37</sup>Akatikala ndoena bolome, la miaka tuku bonanei, aitifowa ta mbele eya Mungu, la akelaka likuwa liokuwela Mungu lotio la lowa la lokilio bieka la basomboli. <sup>38</sup>Kota elo mbile akaya, akalengila Mungu kekelele, la akabeka loka loya Yesu, ta itotina ye ikaoka ye ta Yelusaleme. <sup>39</sup>Ta mbile ekaenganisaka bo, yeke ikabeka Ngene ta bikela, Yosefu la Maliya bakainowa ta Galilaya ta Nasaleta, boki wibo. <sup>40</sup>Wana akakonda la bofoka, la ayali fuu la weli, la ngbengbele eya Mungu embaka linde. <sup>41</sup>Baboti baya Yesu ba'kaka-kaka kila mwaka ta Yelusaleme, ta fete ee lieti. <sup>42</sup>Kola ongoma embaka ye la miaka liou la yele akaka kotutana la asili ibo. <sup>43</sup>Ongoma, ta mbile basio bakaeta, la bakainowa, wana Yesu akatikala ta Yelusaleme; ise inde la inango inde baito luwa mbo aotika. <sup>44</sup>Bato enyela mbo ta bolenga bo lokendo, bakakela lisio limoi la ndole, la bakaluka ye ta befindi bibo, la baluwani. <sup>45</sup>Kola ongoma, baito anya ye, bakabinowa ta Yelusaleme okaluka ye. <sup>46</sup>Ta basio basoso, bakafoeta, baka anya ye ta esondjamelu angali se aiteni ii baekesi ba bikela batolaila ye la bato fela fela ye felo. <sup>47</sup>Batotina bee baokaka ye bakaumomo la baoli binde. Loka lo weli winde, la bamutoli binde. <sup>48</sup>Mbile ba ise binde baka'anya ye bakamba la limwali. inango inde, ee mbo: Wana bofelu bo'ingi o'okela ani? Tene, ise ao lange totolingowe la ngandi. <sup>49</sup>Akabeka mbo: Otolingeni bofelu bo boingi? Oiluwilei mbo iyengani mbo lokelo mbeko iya Afa? <sup>50</sup>Baito lembela yeke abekaka libo. <sup>51</sup>Kola ongoma, akaka libo bolenga bomoi ta Nasaleta, la akalitisa inango inde, akaisa yeb itotina ta botema. <sup>52</sup>La Yesu akondaka la weli. La lilatemi, la ngbengbele felo iya Mungu la felo ii baito.

## 3

<sup>1</sup>Mwaka bo liou la liondo ta talaa eya bokota Tibebe Kaisala, ta mbile Pilato bokota bofi bo Yudeya, Elode ono ambaka bokota bo Galilaya, nduku inde Filipino bokota bo Itula la Tulakaniti, Lisaniya ambaka bokota bo Abilene. <sup>2</sup>Ana la Kaifafe bambaka kanga ifi iya Mungu. La lioi liya Mungu ikaya ambe Yoani, wana aya Zakaliya ta liombebe. <sup>3</sup>Akakenda ta beki betotina fangi ee libande li Yaladene, atonangola mbo: Kikolakai liwawi, la lifiomokoi loka lo limesilomu li bobo wino. <sup>4</sup>Ani isonomoko ta lokasa loya bonangoli Isaya: Imbe limiki liya bomami ta liombebe: Komiakai ndole eya Ngene, bunakai fongo. <sup>5</sup>Biseke bitotina bi bakemba bitowalisomo, fongo ifi la ye ike itomba baala; batoenganisa ndole ibe. <sup>6</sup>La baito batotina batoena eni kanda Mungu atouwisa bo. <sup>7</sup>Atobeka la linginda lieke bambaka batoya loka lo'olufiomo: Bofindi bo fele! Ndai akaekise'nu mbo okimbiyei lisomi liya Mungu lie litoya? <sup>8</sup>Enisakai touma tolo mbo o'osilai okikola liwawi, la ndobekai ta botema wino mbo tombe la ngau iso akumo Abalayama, loka lotobeka lino mbo, kota bee batale Mungu aengani okikola bo baana loka lya Abalayama. <sup>9</sup>Ikomba iyosila otomo ta litina li isandu: Isandu itotina ye yeitibota touma tooo itotenomo la itokusomo ta imbe. <sup>10</sup>Linginda bakafela ye bo, mbo: Tokele ase isani? <sup>11</sup>Ye akamutoela bo mbo: Ono ambe la tulu simusi yele afeke ono aiti la lamo, la ono ambe la bieka a'anele bio la baito. <sup>12</sup>Balipisi ba banjanja bakaya lokalo'osha lilufi, la bakaoyola Yoani:b Boekesi, tokele ingi? <sup>13</sup>Ye akabeka libo mbo: Ndolipisai baito banjanja koeta ani ekabeka ekela. <sup>14</sup>Basola aleko akaiyola ye: Loka liso, towe isani? Akabeka libo mbo: Ndonokilai leka lo buto la bofoka, la ndoibai, kanga mbo oubakelei ango lilipi lino. <sup>15</sup>Ani embaka baito battoumbakela, la batotina bakaiyolamana mbo Yoani aiti Kilisito, <sup>16</sup>akabeka libo batotina mbo: Ei lotolufie'nu ta baye; ndjo ono atoya, ono ambe la bofoka koetei, loiyengani ango osombula boliki bo bilato binde. Ye, atolufie'nu ta Bolimo Botamu la imbe. <sup>17</sup>Ambe la loungu ta boo winde; atofefia mbeku, la atoisa mbeku ta eiselo linde, la atofetcha mboso ta imbe ye yeitotiamaka ango. <sup>18</sup>Aniki ndjo Yoani anangolaka mboli itanu ta baito, la akabeisa bo mbeko isiya iofana bofoka. <sup>19</sup>Yoani akabekela Elode ta litina liya boali aya nduku inde Elodiya, la bakuwa basiya babe beke akelaka, <sup>20</sup>Elode akataliya bakuwa babe, la yeke aotisaka Yoani ta bonyololo. <sup>21</sup>Baito batotina balufiomoko, Yesu aleko alufiomoko; la, ta mbile asembolaka, lobola lokalikolomo, <sup>22</sup>la Bolimo Botanu bokasuluwa ambe ye ta bofono bo lokomba kee ekuku. La limiki likaokana ta lobola mbo: Ombe Wana ange bosamomu; ambe ye losami ye likama. <sup>23</sup>Yesu ambaka la miaka tuku isaso mbile eyakolaka ye likuwa, ta baenyeli ba baito ye ambaka wana aya Yosefu, wana aya Eli, <sup>24</sup>wana aya Matita, wana aya Lewi, wana aya Melekiya, wana aya Yonai, wana aya Yosefu, <sup>25</sup>wana aya Matatiya, wana aya Amosa, wana aya Nahuma, wana aya Asaliya, wana aya Nanga, <sup>26</sup>wana aya Mata, wana aya Matatiya, wana aya Simeji, wana aya Yosefu, <sup>27</sup>wana aya Yada, wana aya Yoana, wana aya Lesa, wana aya Selubabela, wana aya Salatiele, <sup>28</sup>wana aya Neliya, wana aya Meleka, wana aya Adi, wana aya Kosama, wana aya Elomodada, <sup>29</sup>wana aya Eli, wana aya Yosuwa, wana aya Elieseke, wana aya Yolima, wana aya Matita, wana aya Lewi, <sup>30</sup>wana aya Lewi, wana aya Simeona, wana aya Yuda, wana aya Yefu, wana aya Yoname, <sup>31</sup>wana aya Eliakima, wana aya Meleya, wana aya Matata, wana aya Natana, <sup>32</sup>wana aya Tawiti, wana aya Yese, wana aya Obede, wana aya Boasa, wana aya Salamona, wana aya Nasona, <sup>33</sup>wana aya Nasona, wana aya Aminadaba, wana aya Adamini, wana aya Alona, wana aya Eselone, wana aya Pelese, <sup>34</sup>wana aya Yuda, wana aya Yakobo, wana aya Isaka, wana aya Abalayama, wana aya Tela, wana aya Nayolo, <sup>35</sup>wana aya Selungu, wana aya Leu, wana aya Pelenge, wana aya Ebele, <sup>36</sup>wana aya Sela, wana aya Kenana, wana aya Alufasada, wana aya Sheme, wana aya Noa, <sup>37</sup>wana aya Lemeke, wana aya Metusala, wana aya Enoke, wana aya Yaletu, wana aya Mahalalele, <sup>38</sup>wana aya kenana, wana aya Sete, wana aya Adamu, wana aya Mungu.

#### 4

<sup>1</sup>Yesu, akawala la Bolimo Botanu, atofowa ta Yolodani, la akatolomo la Bolimo ta liombebe, <sup>2</sup>elo akakotomo la Satana basiyu tuku inati, ndola, ndomwa, mbisa ibo basiyu, akaoka semba. <sup>3</sup>Satana akabeka linde: Yomba mbo ombe Wana aya Mungu, esaka ishoshu ta lie litale likindowe bokati. <sup>4</sup>Yesu akabinoisela ye: Isonomu mbo: Buto aiyengani ouwa ango loka lo boila. <sup>5</sup>Satana, akaila ye likolo, akaenisa ye la mala emoi bekota betotina be wenda, <sup>6</sup>la akabeka linde mbo: Lombofaka lao bofoka bototina, la talaa iye bekota bie; loka ifomo lange, la lotofa la ono lotolanga. <sup>7</sup>Yomba mbo otokuamelei, itotina yokomba yao. <sup>8</sup>Yesu akamutoela ye mbo: Atosuluwela Ngene, Mungu ao, la otokuwela ye angene. <sup>9</sup>Satana akakesa ye lisiya ta Yelusaleme, akata ye likolo li mbele ee Mungu, la akabeka linde mbo: Yomba mbo ombe Wana aya Mungu, kusamaka eke kota nyele; loka isonomu mbo: <sup>10</sup>Atoesa toshosha ta bakitomo ta litina liao, loka bamoile owe; <sup>11</sup>la batotolo'we ta bao, loka kembo bakolo bao baiumunaka ta litale. <sup>12</sup>Yesu akabinoisela ye mbo: Oiyengani okota Ngene, Mungu ao. <sup>13</sup>Mbisa iyokota ye ta baenyeli batotina bee, Satana aka'aka esika linde kota mbile emoi elo. <sup>14</sup>Yesu, awali la bofoka bo Bolimo, akabinowa ta Galilaya, la lokuku linde lokameyana ta beki betotina. <sup>15</sup>Akaekisa ta bisondjamelo, la akasimolomo la baito batotina. <sup>16</sup>Akaaka ta Nasaleta elo akondaka, la otutana la asili inde, akaota ta esondjamelo lisiyo li Yenga, akaemala loka lo'otanga, <sup>17</sup>la bakafa ye lokasa loya botondoli Isaya. Ekalikolaka ye, akaosha eseke leke lokasonomo mbo: <sup>18</sup>Bolimo boya Ngene bombe ambei, loka afo'uwei la baina loka lonangole mboli itanu ta tobube; aotomei loka lo'ouwisabeke betema bbibo bekaobuneya, <sup>19</sup>loka lobeke lisombulomu li bakandomu, la ta betuku baene, loka losombula bekowa, loka lobeke mwaka bomoi bo ngbengbele eya Ngene. <sup>20</sup>La mbisa, aka kanda lokasa, akafa lo ambe bokowa, la akangala'se. Batotina beke bambaka ta esondjamelo bakamba ango batoimila ye. <sup>21</sup>Kola yamo aka'akola obekela bo: Laboni lie lioi li tosiyo, yeke okaokai, lifoenganisomo. <sup>22</sup>La batotina bakabeka loka linde, bakambaka batomwala ta baoi ba ngbengbele beke bambaka batotomowa ta bonoko winde. <sup>23</sup>Yesu akabeka libo: Ndoena fiye otobekai lange weke bombila mbo: Bonganga, uwisaka owe angene; la otobekai langa mbo: Waka aleko eke ta boki wao ani ekaoke'su ani oko'owa ta Kapelanauma. <sup>24</sup>La akataliya, lotobeka lino mbo ta wewe otobotondoli ono ambe la lokuku ta boki winde. <sup>25</sup>Lotobeka lino ta wewe mbo: Ikambaka Eliya, la mbile ekandomoko lobola miaka besaso la tengai liambe la semba fafo ta wenda bototina; <sup>26</sup>la Eliya

aikatomomo ango ta amoi ibo, sakolo kota oko botaali, ta Salapata, ta boki bo Sidona.<sup>27</sup> Imbaka aleko la baito ba baandi; la ango amoi ibo aitanisomo, sakolo ko Namana buto a Asuliya.<sup>28</sup> Bakasoma bo'atolina ta esodjamelo, ta mbile eokaka bo yo mbeko.<sup>29</sup> Bakaemala, bakasaya ye ta boki, la bakaka linde kota isoko ii longo yeke boki boshomoko, loka basuluwise la sekala.<sup>30</sup> Ndjo Yesu akaeta aiteni ibo, akaka.<sup>31</sup> Akasuluwa ta Kapalanaume, boki bofi bo Galilaya; la akaekisa lisiyo li Yenga.<sup>32</sup> Bakaumana la libeki linde; loka ambaka atobeka la ki'bokota.<sup>33</sup> Ikambaka la buto amoi ono ambaka la bolimo bobo ta esondjamelo, la atomama la limiki lifi mbo: <sup>34</sup>Aisai! Ingi imbeaiteni iso lao Yesu a Nasaleta? <sup>35</sup>Yesu akasaya ye, akabeka: Kandaka bonoko, la tomowaka aiteni iya ono buto, la bolimo bobo bokakusama aiteni ii esondjamelo, la akatomowa, ndoena ango okela ye wale. <sup>36</sup>Batotina bakamwala, la bakabeka amoi la amoi mbo: Eni kanda ee lioi ene? Atobeka la ki'bokota la bafpka ta belimo bebe, la batotomowa!<sup>38</sup>Ekatomowaka ye ta esondjamelo, akaka ta mbele eya Simona. Bobili aya Simona ambaka la bomusi bo likama, bakalombokola ye ta litina linde. <sup>39</sup>Akakoma likolo linde, akasaya bomusi, la bomusi bokatika ye. Kota mbile amo, akaemala, la akakuwela ye.<sup>40</sup>La bokolase kolase, batotina ne bambaka la bemusi likama bakayela ye libo. Akataliela amoi la amoi bao, la bakauwa. <sup>41</sup>Belimo bebe aleko bekatomowa ta bee baito likama, batomama la batobeka mbo: Ombe Wana aya Mungu. Akasaya bo la aikalanga mbo ba beke, loka bakaluwaka mbo ambe Kilisito.<sup>42</sup>Mbile ekandjaka bese, akatomowa la akaka ta eseke lomoi lo liombe. Embili lo baito bakaluka ye, la bakakoma ko'oko embe ye; bakamba la yeme iongala linde, loka aitikaka ale bo. <sup>43</sup>Ndjo akabeka libo mbo: Iyengani lange longalo ta beki befi besiya mboli itanuiya Mungu, loka lo yamo ndjo lokatomomo. <sup>44</sup>La akanangola ta bisondjamelo bi Galilaya.

## 5

<sup>1</sup>Ani embaka Yesu mbale ebaye tina la Genesaleta, la baito babule akasuma mbale inde loka loumbakela lioi liya Mungu, <sup>2</sup>Auwaka mbale ibasuwa baele, ongo embaka baluwi biengo loka loosala biengo. <sup>3</sup>Akalila ta lisuwa limoi, lieke limbaka Simona, la akasombola esika la nyele. La akangalase ta lisuwa, la akeikisaka baito babula. <sup>4</sup>Ani etikaka obeka, akabeka la Simona:susamaka ta baye, la kusakai biengo loka oluwei. <sup>5</sup>Simona akamutolae:boekesi to'oluwa biengo lotiyo lototina ndoena ango imai'imai,la,loka lo lioi liyao lombokuka wengo ta baye. <sup>6</sup>Akakusa wengo ta baye, bakaita likama lisuwe, la wengo winde bowalaka fuuu la suwe. <sup>7</sup>Bakabeisa ba kendani baye oya sunga bo. bakaya la bakawalisa basuwa baele, la suwe. <sup>8</sup>Tambile enaka bo ongoma, Simona Petelo akangalase ta baluwi baya Yesu, la akabeka: Ngene, susamaka esika lange, loka lombe buto a bobo. <sup>9</sup>Mbile eokaka be baiti la liimemeli,la batotina be bambaka linde, ta litina li oluwa wengo weke boluwakae. <sup>10</sup>La imbaka namo na emoi ke iya Yakobo la Yoani, bana baya Zebedeya, basamomu boya Simona. la ongoma Yesu akabeka la Simona oibangaka leka ango lomoi, koandja laboni omba boluki bo baito. <sup>11</sup>La,akaesa lisuwa la ngonge, lokatika itotina, la bakatutae. <sup>12</sup>Yesu ambaka ta boki bofi, la enakai, botolome amoi ambe la baendi, akaena e, akangalase felo inde,la akamba elae: Ngene, yomba mbo osami,okoengana otanisei. <sup>13</sup>Yesu akataliyelae boo, akamwala linde, la akabeka: lombe la yeme, la mangu baendi bakafoa. <sup>14</sup>La akabeisabo mbo baibeisaka buto ango amoi,mbo, abekaka,kaaka la oenise bakanga,la bafayoe loka lo litanusomu lieke Moize abekaka ta tunga mbo yamo itosunga loka lo lilendelu. <sup>15</sup>Lina linde likafafana mala lamala, la baito bakaya babule loka loumbakelae loka bouwisomo la biale bibo. <sup>16</sup>La linde, akaka ta liombe, la asombolaka. <sup>17</sup>Lisiyo limoi Yesu aekisaka bo. la bafalusai la baekisi ba bikela ba mbaka onga bangalise,bayaka ta beki betotina Galilaya, la Bayuda, la Bayelusalema: la baya Ngene bo enisamanaka la luwisi. <sup>18</sup>La moilaka,baito, bakatola buto amoi ta litamba ono alengetani, oluka otisae la osela sekala ibaiso ba ya Ngene. <sup>19</sup>Ani eitiluwa eseke lota, ta ani embaka baito babule, bakalila likolo li losambo,la bakasuwala ofungola, la litamba linde aiteni inyele, felo iya Yesu. <sup>20</sup>Akaena lienesi libo, Yesu akabeka: botolome, bobo wao bo onesilomo. <sup>21</sup>Baandiki la Bafalusaya ba kaimaima la loenyelo la obeka mbo; ono ambe ndai, e ono atofeka bobo? ndai koengana omesila bobo,ani yeiti ko Mungu engene?<sup>22</sup>Yesu oluwa baenyeli bibo, akabeka libo; bani baenyeli bambe lino ta betema bino? <sup>23</sup>Ini imbe la kimia, la oleka; bobo bo omesilomo, la obeka: emalaka, la kendaka? <sup>24</sup>Ongoma,la mbo oluwei mbo wana a buto ambe ta nyele isaso iyo mesila bebe: la totomoe, akabeka ta buto ono alengetani, emalaka, la osaka itoko yao, la kaaka ta mbele. <sup>25</sup>La, umbakela,akaemala felo inde, akatola itoko yeke alalelaka, la akaka ta mbele inde talaa iya Mungu. <sup>26</sup>Batotina bambaka ta limwali,la talaa talaa iya Mungu, bakawala la boa, bakabeka:tofoena la boni isika. <sup>27</sup>Mbisa iya iyamo, Yesu akatomowa, la akaena baito babule lina linde Lewi,angalise ta eseke loba Peyayeya. Akabeka linde, tutekei. <sup>28</sup>La, akatika itotina, la akaemala,la akatutae. <sup>29</sup>Lewi akafaye likama felo ta mbele inde, la baito babule la basiya baito bambaka linde ta mesa emoi. <sup>30</sup>Bafalusaya la basoni bakaimaima, la lobeko la baeki binde mbo: Loka loingi otolai la otomwai la baito ba lingali libe? <sup>31</sup>Yesu, akabeka lioi, akabeka libo mbo: Yeiti bo beke batolaka la weli bambe la yeme ii bonganga, loka lo baito ba biale ndjo. <sup>32</sup>Loiyeli oyate'nu lioi loka lo likalanganyili baito ba wewe, kanga ango loka lo baito babe. <sup>33</sup>Bakabeka linde: Baeki baya Yoani, kee bo bee ba Bafalusaya, botokila mbile etotina la ani batosombola, la libo basiya batola la batomwa. <sup>34</sup>Akamutola mbo: Oengani okila baito lange ba libala ta mbile ee libala libo? <sup>35</sup>Basiyo batoya oni bolome ambo emalaka, kola ongoma batokila ta basiyamo. <sup>36</sup>Akabeka libo la bombila: Buto ango amoi aimbofaa tuluekakani la betuku loka imbe tulu ene ekafoumowa; ta mbile, embofoaka tulu ekanikani, la betuku la aimbosambo atomowe ta baito batoolo. <sup>37</sup>Buto ango amoi aimbota baana bayai ebengu losiya; bofono bosiya, baana bayai batoseisa basiya, batomeanisa, la baito basiya batobunga; <sup>38</sup>Iambo iyengani ota baana bayai ta basiya bayai. <sup>39</sup>La buto, mbisa iyomwa baana bayai, la aofeka omwa baana bayai, lokambo, atobeka, baana bee bakafoumowa bambe balo.

## 6

<sup>1</sup>Ta lisiyo li sabata akaeta ta bilanga bi bakoke. Baeki binde bambaka batobuna bakoke lani batola, lani bato finya yo la bao bibo. <sup>2</sup>Bamoi ta Bafalisai baka beka mbo, loka loingi otokelai yeke yeiyangani lisiyo li sabata? <sup>3</sup>Yesu aka binoisela bo mbo, osilai osomai yeke ikelaka Dawidi oko eokaka ye semba la beke bambaka linde eske lomoi? <sup>4</sup>mbo akaota ta mbele Mungu, akasa bolia boke ndjomomo, akala, la akafa la beke bambaka linde eske llomoi, ene embaka mbo buto asiya ailaka, sakolo ko bakanga. <sup>5</sup>Akabeka aleko libo mbo, Wana a buto ambe Ngene a sabata. <sup>6</sup>Ta sabata esiya akaota ta esongamelo la akaekisa, la buto amoi ambaka onga, boo winde bo bolome bokafomela. <sup>7</sup>Bandiki la Bafalisai batokuka ye, oena lamba atouwisa ye ta sabata, loka banye ndole eositaka ye. <sup>8</sup>Ye akalembela baenyeli bibo la akabeka la bltolome ono aomeli boo mbo, Emalaka la katikati! La akaemala ongoma. <sup>9</sup>Yesu akabeka libo mbo, lotofelenu mbo, iyangani okela likuwa libe ao lilo lisiyo li sabata? Iyngani ouwisa liwawi, lamba oseisa lio? <sup>10</sup>Mbisa iyo moila bo batotina, akabeka libo mbo, Ilaka boo wao likolo! Akakela kongoma, la boo winde bokauwa. <sup>11</sup>Bakawala la lisomi kofu, la bakabekamana lamba batokelela Yesu loni lobeko. <sup>12</sup>Ta basiyo bamo akatomoa la akaka ta longo oka sembola. Akakolo elo lotiyo lototina losembolo Mungu. <sup>13</sup>Ekandjaka nongo akata baeki binde elo embe ye, la akachakola liou la baele katikati ibo, la akata bo mbo Baeki. <sup>14</sup>Simona ono atomoko mbo Petelo, la Andelea nduku inde, la Yakobo, la Yoani, la Filipino, la Balatelemi, <sup>15</sup>la Matayo, la Toma, la Yakobo wana a Alafai, la Simona ono atomoko mbo Moselote, <sup>16</sup>la Yuda wana a Yakobo, la Yuda buto a Keliota ono aungisaka ye. <sup>17</sup>Akasulua la be eseke lomoi, la akaemala ta eseke lo fololo, la linginda lifi li baeki binde bambaka, la likama li baito beke bafoka ta Yuda, la Yelusalem, la wenda bo bomongo bo Tulo la Sidona. Bakaya oya okaye la louwisomo la biale bibo. <sup>18</sup>Beke bambaka la belimo bebe bakauwisomo. <sup>19</sup>likama li baito bakatokta ounda ye, loka bofoka bokambaka botofoa ye la louwiso bo batotina. <sup>20</sup>Akaila baiso binde ambe baeki binde la akabeka mbo, Liomali lino tobube, loka mbo Bokota boy Mungu bombe wino. <sup>21</sup>Liomali lino baito otokai semba kanikani, loka mbo otokumai solo. Liomali lino baito otolelai kanikani, loka mbo otosekai. <sup>22</sup>Liomali lino oko otoyana baito lino, la oko bato kilenu, la oko etofoya bo lina lino kee lina libe loka loya wana a buto. <sup>23</sup>Omalakai ta lisiyo liamo la tilakai la liomali, loka mbo lilipi lino limbe lifi elo ta Lobola, loka mbo bangau bibo bekelaka kongoma ta banangoli. <sup>24</sup>Ngandi lino bafoka loka ofomoi bofoka wino. <sup>25</sup>Ngandi lino baito beke okaokumai solo kanikani, loka mbo ombo kakai semba. Ngandi lino baito beke otosekai kanikani, loka mbo otombai la ngandi la otolelai. <sup>26</sup>Ngandi lino yomba kembo baito batotina batobeka bolo loka lino, loka bangau bibo bekelaka banangoli la lolanga kongoma. <sup>27</sup>Ndjo lotobeka lino baito be otokai mbo, samakai baiyani bino; kelaka bolo ta beke batoyana lino; <sup>28</sup>Simolakai beke batolakelenu bobo. <sup>29</sup>Yomba mbo buto aka fougowe lobaka ta likeka limoi, enisaka ye likeka lisiya. Yomba mbo buto akaopko lowe tulu ao, oifekilaka ye la mokoto wao. <sup>30</sup>Faka libo yeke batolengilo we. Ndo lingale biengi biao ta bakpoliki. <sup>31</sup>Kanda emoi embenu la yeme mbo baito bakelelenu, kelelaka bo kongoma. <sup>32</sup>Yomba mbo otosamai basamomu bino, ombei la lini lilipomu? Loka mbo baito ba bobo batosama basamomu bibo. <sup>33</sup>Yomba mbo otokelai bolo ta beke baka kelelenu bolo, ombei la lini lilipomu? Baito ba bobo batokelaka aleko ongoma. <sup>34</sup>Yomba mbo okao kopishai bieka bi baito, beke ombei la lilendelu lionya bieka bibo, ombei la lini lilipomu? Baito ba bobo batokopisha bieka mbo loka banye bieka kanda yamo la mbisa. <sup>35</sup>Ndjo samakai baiyani bino, la kelaka bolo la kopishakai baito, ndjo oitakai botema mbo otoanyai leka, la lilipomu lino litomba lifi, la otombai bana baya Ono-Aeti likolo, loka kembo ye ambe la botema bolo ambe be baenu losamo la baito babe. <sup>36</sup>Mbaka la ngandi kani embe Ise ino la ngandi. <sup>37</sup>Ndo tongai buto loka mbo oitongomokoi aleko. Ndosuluwisai loka mbo oisuluwiso mokoi. Mesilakai loka mbo omesilomoi aleko. <sup>38</sup>Fayakai la itofomo lino aleko. katikati ibao bino ofofai ipimo ilo i keni ikasila loamomo la loyeyemo la loutomose. Loka mbo bato pimelenu ta ipimo yeke oka pimakai. <sup>39</sup>Akabekela bo bombila mbo, buto a botuku aengani okendisa botuku lemo? Batotina baele baitokpase ta likemba? <sup>40</sup>Boeki aiyeti boekisi winde, ndjo buto la buto, ono akaosila; oeka itotina, atomba kee boekesi winde. <sup>41</sup>Otomoi la litoko ta liso liya nduku ao ndjo oitoea lofututu ta liso liao angene loka loingi? <sup>42</sup>Oengani obeka la nduku ao mbo, nduku, tikaka lofoye lofututu ta liso liao, ani koni oitakaena litoko ta liso liao? Buto a lolanga! foyaka koni lofututu ta liso liao, ndjo lambisa oitoea fololo otomoisa litoko ta liso liya nduku ao. <sup>43</sup>Loka mbo isandu ilo yeito bota touma tobe, la isandu ibe yeitobota touma tolo. <sup>44</sup>Isandu la isandu itoluamana kota yuma inde. Loka mbo baimbo buna suke ta bekeke, la baimbo buna miwiti ta liwa koliokolio. <sup>45</sup>Buto bolo atotomoisa ko bolo ta mbeko ilo isami ta botema winde, la buto bobo atotomoisa ko bobo ta mbeko ibe, loka bono winde bobeka mbeko yeke iwali ta botema winde. <sup>46</sup>Loka loingi ototei Ngene, Ngene ani oitokelai mbeke yeke loka beka? <sup>47</sup>Loka lo buto la buto ono akaya ambei la afoka mbeko yange la ye kolitisa yo, lotoenise nu lamba ambe kee ndai. <sup>48</sup>Ambe kee buto akaswa mbele, ono akabusha bakemba, akalinda la bolundu, la akata liako likoo li batale. Tambile ekaya fela, libande lika tomboka ta mbele amo, ndjo yeikangana oyeyisa yo, loka kembo ishomo la weli. <sup>49</sup>Ndjo ono aitoka baio bande, la ailitisi yo, ambe kee buto ono akashwa mbele ndoena liako, likolo li nyele; libande likaya fela likolo linde, la likaukowa la mangu lobunowo lo mbele amo lombaka lofi fafo.

## 7

<sup>1</sup>Mbisa iyosilisa linangoli litotina felo ii baito beke bambaka bato'oka, Yesu akaota ta Kapelanaume. <sup>2</sup>Bokowa boyo Kapiteni amoi a basilikani ambaka la wale tinatina la lingba. Kapiteni asamaka ye likama, <sup>3</sup>La ekaokaka ye mboli iya Yesu, akatomela ye batolioso ba Bayuda olengila linde mbo aye oyauwisa bokowa winde. <sup>4</sup>Bo bakaya ambe Yesu la bakalombokola likama mbo, Aengani mbo okelele ye ongoma, <sup>5</sup>Loka mbo ambe la losamo ta bofindi wisu, aoshwelesu Esongamelo. <sup>6</sup>Yesu, akaka libo, ani aitaakaka esika la mbele, mbile bokota bo basilikani miya akatoma basau loka babeke linde mbo: Ngene oiyenaka ango wale bofi; loka loiyangani lokambo o'ote ta mbele ange. <sup>7</sup>La loka lo'ongoma aleko ndjo loikaimila loke eiyangane ambe owe. La bekaka ango lioi limoi, la bokowa wange atouwa. <sup>8</sup>Loka, ei ono lombe sekala ii

beke bambe likolo liange, lombe la basilikani sekala ii toshosha chuange; lotobeka la amoi: Kaaka! La atoka; la ono moi: Yo'oko! La atoya; la bokowa wange: Kelaka ani! La atokela.<sup>9</sup>Mbile Yesu akaoka bo baoui, akamwala bokota bo basola, la, akatimba elo ta linginda lieke batutaka ye, akabeka mbo: Lotobeka lino, imbe ende ta Isalaele loiyoshi liimeli lifi ani.<sup>10</sup>Ekabinowaka ye ta mbele, baito beke bokota bo basola miya atomaka bo bakaosha bokowa ono ambaka la bomusi akafouwa.<sup>11</sup>Lisiyo li mbisa, Yesu akaka ta boki bomoi bokatomo mbo: Naina, baeki binde la linginda lifi bakakenda linde ndolemoi.<sup>12</sup>Mbile ekomaka ye tinatina la boindabo boki, tene, bakatolaka ta nyele bolyo bomoi, wana ko'amoi ainango inde, ono angbeloko bolome, la akambaka la baito ba bule ba boki.<sup>13</sup>Ngene, akaena yee, akaoka ngandi loka linde, la akabeka lindembo: Oilalaka!<sup>14</sup>Akaka tina, la akaunda sanduku, beke batolaka bakaemala. Akabeka mbo: Wainenge, lotobeka lao emalaka!<sup>15</sup>La bolyo akangala'se, la aka'akola obeka, Yesu akakesa ye ambe inango inde.<sup>16</sup>Batotina bakambaka la bowa, la bakasimola Mungu, obeka mbo: Bonangoli bofi afoenena ambe'su, la Mungu aokendela baito binde.<sup>17</sup>Lioko lioi loka loya Yesu likameyana ta Yudeya itotina la ta beki betotina be tina-tina.<sup>18</sup>Yoani akabeisomo tayo mbeko itotina la baeki binde.<sup>19</sup>Akata baele, la akatoma bo ambe Yesu, loka lo'obeka linde mbo: Ombe ono atoya, lamba toumbakele asiya?<sup>20</sup>Bakakoma tina la Yesu, bakabeka mbo: Yoani Bolufii akatome'su ambowe, loka tobeka mbo: Ombe ono atoya lamba toumbakele asiya?<sup>21</sup>Kota mbile amo, Yesu akauwisa baito ba bule ba biale, bitukulu, la belimo bebe, la akalikola baiso ba betuku be bule.<sup>22</sup>Akamutoela bo mbo: Kakai okabeisa la Yoani yeke okaenai la yeke okaokai: Betuku bafuena, bitukulu baokenda, baito ba baandi baotanisomo, beoko bafooka, bangbei baofufuka, mboli itanu iyonangolomo ta tobube.<sup>23</sup>Liomali ambe ono loikamba likula loka linde.<sup>24</sup>Mbile ekaka batomomu baya Yoani, Yesu akabeka la linginda, loka loya Yoani mbo: Okei okaena ndai ta liombe? Lokoli leke lotoyeyemo la lofofo?<sup>25</sup>Ndjo, okei okaena ndai? Buto ono abati tulu ilo? Tene, beke batobata tulu ilo, la batouwa ta bolo, bambe ta ba mbele ii bekota.<sup>26</sup>Okeiase okaenai ndai? Botondoli amoi? Iiuh, lotobeka lino, lamba ono aiti botondoli:<sup>27</sup> Loka linde, ani ikaosila osonombo ta litina linde mbo, Tene, lotoma botomomu wange felo yao, la ye atokomanya ndole ao felo yao.<sup>28</sup> Lotobeka lino mbo ta beke bakabotomo la bataali, buto aeta Yoani aiti, ndjo ono aeti boke ta bokota noya Mungu aeti ye la bofi.<sup>29</sup> Baito batotina, kola bokongoli bo lindjandja, beke baokaka ye, bakalongisa Mungu, eke elufiomoko-bo la lilufi liya Yoane.<sup>30</sup> Kola Bafalisai, la Baekisi ba bikela bakafeka lisangi liya Mungu ta liitna libo, loka baitilufiomo linde.<sup>31</sup> Loenganise baito ba Bofindi we la loni leka? Bambe kee ingi?<sup>32</sup> Bambe kee bana be bangalise ta liongo, batoota baito libo mbo, Tokaumelekenu filimbi, ndjo oikabinakai; tokalela bongbei, oika lelakai.<sup>33</sup> Loka Yoani bolufi akaya, aitila boila la aitimwa vinya, la okabekai mbo, Ambe la bolimo bobé!<sup>34</sup> Wana a buto aoya, aola la aomwa, la obekai mbo, Tene bolei la bolewi, botchthaki bo bakongoli ba lindjandja la baito ba bobé!<sup>35</sup> Weli aolonga loka lobana binde batotina.<sup>36</sup> Buto amoi ta Bafalisai akata Yesu mbo ale linde bieka eseke lomoi. Akaota ta mbele eya Bofalisai wamo la akangala ta mesa.<sup>37</sup> Botaali amoi ta boki, botaali bo bobé, akaluwa mbo Yesu angalise ta mbele eya Bofalisai, akaya la bonyongo la baina ba liesa.<sup>38</sup> Akaemala mbisa inde ta bakolo binde akalela, akakola otokisa bakolo binde la baye babaiso, la akaombula yo la sowe i bakolo binde, la ouwa la baina ba liesa.<sup>39</sup> Oko eenaka Bofalisai, ono ataka ye ongoma, akabeka ta botema winde mbo, loka lo buto ono, amba koimbu Bonangoli, ani aoluwa mbo ono botaali akaunda ye ambe boni bomuna, loka ambe botaali bo bobé.<sup>40</sup> Yesu akbeka linde mbo, Simona, lombe la lobeko lomoi lobeka lao. Akabeka mbo, bekaka bao, Boekesi.<sup>41</sup> Bokopisi amoi ambaka la baito baele ba bolima. Amoi a bolima ambaka la bieto mia liondo, asiya bieto tuku yele.<sup>42</sup> Baitimba la leka lo lipa, la akamesila bo batotina baele. Kolaongoma, ndai kati ibo oni buto atosama ye?<sup>43</sup> Simona akabinoisa bonoko mbo, lofoenyela kembo ono akamesila bolima afoeta bofi. Akabeka linde mbo, otena wéwé.<sup>44</sup> Kolaongoma, akakikowa ambe botaali akabeka la Simona mbo, otoena botaali ono? losiota ta mbele ao oikafei baye loka losoola bakolo bange; ye aotokisa bakolo bange la foo inde la afoomba yo la sowé inde.<sup>45</sup> Oikafei litukumeli, ndjo ye kota lioti liange eke ye aitiki otukumaeli bakolo.<sup>46</sup> Okauwa botchwé wandela baina, ndjo ye afouwa bakolo bange la baina baliesi.<sup>47</sup> Yamo yoko lotobeka lao mbo, bobé winde likama yo mesilomo, loka ambe la losamo likama. Ndjo ono akamesilomo iniyo ambe la losamo loke.<sup>48</sup> Akabeka la botaali mbo bobé wao homesilomo.<sup>49</sup> Beke bangalaka linde eseke lomoi, bakakola obeka mbo, ono ambe ndai, ono atomesila batchwanilo?<sup>50</sup> Ye akabeka la botaali mbo, limeli liyao liosila ouwiso we; kaaka yao la lilatemi.

## 8

<sup>1</sup>Kola ongoma Yesu akaka ta beki befi la beki bekikelike, okanangola la okabeka mboli iyai iya Mungu. <sup>2</sup>Baeki liou la ye le bambaka linde, la baali beke bauwaka la belimo bebe, la biale: Maliya ono a Mangandala, ono afoyomoko belimo bosambale. <sup>3</sup>Yoana boali aya chusa, bofaya'faya boya bokota Elode, la Susana, la bataali basiya babeele bee basungaka bo la biongon bi bieto bibo. <sup>4</sup>Eko etoamanaka linginda li baito, baito bafuoka ta wenda la wenda loka looya ambe ye, akabeka libo la bambila mbo, <sup>5</sup>Bolobi atomoaka akaloba mbeku inde. Ta boloba winde, mbeku isiya ikakpasé mbale endole, la tokamatelomo, la noli i likolo bakala yo. <sup>6</sup>Mbeku isiya ikakpasé likolo li batale la etomoaka yo, ikafia loka lo boeno bo baye. <sup>7</sup>Bosiya bokakpase ta keke; keke ikaama wo, la boikondi. <sup>8</sup>Bosiya bokakpase ta nyele ta mbile ekakonda wo, bokabota touma miya la miya. Mbisa iobeka ongoma, Yesu akabeka la limiki lifi: Ono ambe la batoi bao'oka aokeke!<sup>9</sup>Baeki binde bakaiyola ye laomba litina libombila limbe isani. <sup>10</sup>Ye akasanoela bo mbo baisomu i bokta boya Mungu yosila ofomo lino loka oluwei, ndjo ta basiya kola bambila, loka etomoila bo, baiyenaka, la etooka bo , bailuwaka litina.<sup>11</sup>Tene litina li wo bombila: Boloba bombe lioi liya Mungu. <sup>12</sup>Boloba we bo ndole, imbe bee bato'oka lioi la Satana ye koya, la ye kofoya lioi ta betema bibo, la bowa bo baiyimilaka la louwisomo. <sup>13</sup>Boloba we bombe ta litale, imbe beke bakaoka lioi, la bakaoka la limengo; kolaongoma baiti la beili, bakokonda ango iniyo ii mbile, bo kotukowa ta mbile ee lofofo.<sup>14</sup>Yeke ikakpase ta keke, imbe beke, bakaoka lioi, la bakaita lio la yeme, bofono la bofono, bo ndo bota touma toengani. <sup>15</sup>Boloba we bokakpase ta

nyele, imbe beke bakaoka lioi, la botema bolo, bakatola lio ta botema, la bakabota touna la bofilili.<sup>16</sup>Buto, mbisa iobaanisa tala, ee ndoufa amo ta tulu, ee ndota sekala ii mesa, kolaongoma akota likolo li mesa mbo beke bato'ota la mbele baene liangangi.<sup>17</sup>Loka ndoena ango lomoi lo isami leee loitoenena, ndoena ango sekala emoi etoisama.<sup>18</sup>Kelakai keba la bofono we boto'okenu; loka belafaka ono ambe la lelo la ango aundi bokonokila ye itoenyela mbo inde.<sup>19</sup>Inango la bitungani biya Yesu bakaya oya anya ye: Baito anyamana linde loka lo baito ba bule.<sup>20</sup>Bakabeka linde mbo: Inango ao la bitungani biao bambe lousa, bambe la yeme baeno we.<sup>21</sup>Kola ongoma akamutoela bo mbo: Inango ange la bitungani biange, imbe beki bie bato'ika baio baya Mungu, la bo kokuela bo.<sup>22</sup>Lisio limoi, Yesu akalila ta longo lomoi la baeki binde. Akabekelabo; etakai fangi elibande lifi. La bakaeta.<sup>23</sup>Eakolaka bo loluko, Yesu akakpa ilo, lofofo la ngumba ekamba ta libande lifi, la wato bakawala la baye, la bakabanga.<sup>24</sup>Bakaya ambe ye la bakafoya ye, la bakabeka mbo,Boekesi! Boekesi! Tongba! Ye akalingoa ta ilo la akafekila lofofo la lotomboko lo baye. Ikatika kolaongoma loemalo lokaya.<sup>25</sup>Kolaongoma akabeka libo mbo, Limeli lino limbe ende? Ndjo baka banga la bakamwala, la baka bekana mbo, Ono ambe ase ndai ani? Loka aobeka la lofofo la baye baolitisa ye.<sup>26</sup>Bakakoma ta yese iba Gelaseni, imbaka tinatina la Galilaya.<sup>27</sup>Mbile efoaka Yesu ta wato, buto amoi aboki bofi, ono ambaka la likama libelimo bebe. Ko felo aitibata tulu, la aitimba okpa ilo ta mbele, lilali linde ko ta mbila.<sup>28</sup>Mbile enakaye Yesu, akamama, akangalase ta bakolo baya Yesu, la akabeka la limiki lifi; ei mbo tombe laloni lobeko, Yesu, Wana aya Mungu a Likolo? Lolangi mbo, oifekei litchwanelo.<sup>29</sup>Kolaongoma Yesu akabekela bolimo bobo bofowe ambe botolome amo, loka bolimo wamo boiuoaka linde mbile esa bakande bakolo la bonyololo, ango ongoma ko atotena bonyololo, la bolimo bobo bombaka okendisae ta lokonda.<sup>30</sup>Yesu akaiolae; lina liao ndai? Ye mbo; likama, abekaka ongoma loka belimo bebe'otoka likama ta lokomba linde.<sup>31</sup>Belimo biamo la Yesu mbo biekaka ta likemba.<sup>32</sup>Be bambaka elo, ta longo, likula lingulube lifi-lifi. La belimo bebe'akalengila la Yesu looka beote ta likula lingulube. Akabekela bio beote ta likula.<sup>33</sup>Belimo bekafowa ta botolome amo, bekaota ta ngulube, la ngulube ikaka mangu ta loongo, la ikakusama ta baye, la ikangba.<sup>34</sup>Mbile'enaaka baito be bakuka ngulube' mbo iokame, bakaka mangu okabeka mboli ta boki bofi, mbo biseke bisiya.<sup>35</sup>Baito bakaka okaena mbeko ye ikakoma, bakakoma'ambe Yesu, la bakaosha butu ono belimo bebe befoaka'ambe ye angalakase ta bakolo baya Yesu, abati tulu la'ambaka la baenyeli balo, baito bakabanga ye.<sup>36</sup>Baito batotina be baenaka ikesi yamo iyetaka, bakabeisa baito kanda euwaka ono buto a belimo bebe.<sup>37</sup>Baito batotina ba yese ii Bakelasene bakasamboela Yesu mbo ake esika libo, loka bambaka la bowa bo likama.<sup>38</sup>Buto'ono afoyomoko belimo bebe akalengila ishoshia iotika ta eseke linde. Kolaongoma Yesu akatoma, akabeka.<sup>39</sup>Binoaka ta mbele ao, la beisaka baito mbeko ye Mungu akakeleloe. Akaka, la'akabeka ta beki betotina ye Yesu akakelae.<sup>40</sup>Ta lobinowo linde, Yesu akanyangelomo la la likama libaito,oka baumbakelakae.<sup>41</sup>La tene, akaena botolome amoi, lina linde Yailo, ambaka bokota bo esondjemelo. Akakusama la nyele ta bakolo baya Yesu, la'akabeka la Yesu mbo ake tambele inde,<sup>42</sup>Loka'ambaka la boseka koamoi ono ambaka la miaka liou labiele alangi ongba. Ekendaka Yesu ta ndole, embili libaito litotutana linde.<sup>43</sup>Kumbi botaali amoi ono aumoaka la wale bongelo miaka liou la biele, la'silisaka falanga inde ta benganga, ndoena liuwisi ango limoi.<sup>44</sup>Akashushama la mbisa, la'akaunda yombo itulu eya Yesu. Kota mbile amo ngelo ikatena.<sup>45</sup>Kolaongoma Yesu akabeka; ndai akaunde? Baito batotina bakaanganya, Petelo labe bambaka bakabeka; bokota, baito balingeli owe, la baami owe, la otobeka mbo; ndai aka unde? <sup>46</sup>Kolaongoma Yesu akamutola; amoi aunde, loka loka loluwi mbo bofoka botofowa ambei.<sup>47</sup>Botaali akaena mbo aluomo, akaya la lobilimo oya kusama ta bakolo ba Yasu, la'akabeka felo ibaito batotina litina lie likauwisomo ye mangumangu.<sup>48</sup>Yesu akabekelae; wana'ange botaali, liimeli liao lisiuwisoe, kaka la aii.<sup>49</sup>Mbile embaka etobeka Yesu, buto amoi ato fowa ta eseke loya bokota bo esondjemelo atobeka; boseka'aõ aongba; oitungisaka'ango boekesi.<sup>50</sup>Kolaongoma Yesu akaoka lioi liamo, akabeka la bokota bo esondjemelo; oibangaka leka, enyeleka'ango, la atouwa.<sup>51</sup>Mbile akomaka ta mbele, aitisama mbo buto aote linde, akata'ango Petelo, Yoani, Yakobo, la ise awana, la inango awana.<sup>52</sup>Batotina bakalela la loetiso foo ta baiso. Yesu akabeka; oilelakai; Aingbeli, ambe ta ilo.<sup>53</sup>Labakasekaë, oka baluaka mbo aosila ongba.<sup>54</sup>Yesu akaunda boo bo wana, la'akabeka la limiki lifi; wana, emalaka.<sup>55</sup>La bolimo winde boka, la'akalingoa,kolaongoma Yesu aka ishoshia iofae bieka.<sup>56</sup>Ise la Inango bakamwaala, la Yesu akabeka libo mbo baibeisaka buto ango amoi lobeko lee lokakelomo.

## 9

<sup>1</sup>Yesu akatoamanisa Baliou la baele la akafa bo bofoka la ishoshia likolo li baloimo babe, la ouwisa biale betotina.  
<sup>2</sup>Akatoma bo bake okanangola Bokota bo likolo boya Mungu, la louwiso biale.<sup>3</sup>Akabeka libo mbo, oiyosakai leka ango lomoi loka lo lokendo, imbe itumbo, imbe litanga, imbe boila, imbe falanga,lamba tulu yele.<sup>4</sup>Yomba mbo ootootai ta eni mbele,ngalakai onga; tii kani embokekenu.<sup>5</sup>Loka lo beke baitotukumaelenu, oko embo foekenu ta boki wamo, kusakai bouta bo bakolo bino loka lokebisa -bo.<sup>6</sup>Bakafoa onga la bakaeta ta beki beke la bakanangola Mboli itanu la bakauwisa fangi la fangi.<sup>7</sup>Ekaokaka Bokota Elode ye mbeko itotina etomoaka, akakendisae baenyeli likama loka basiya bakabeka mbo Yoani aofufuka ta lingba,<sup>8</sup>La basiya mbo Eliya aotomowa, la basiya mbo amoi ta Banagoli ba kwala aofufuka.<sup>9</sup>Elode akabeka mbo, ei lotenaka Yoani botchwé, la ono ambe ndai lotooka ye mbeko ta litna linde? La akalinga ndole eona ye.  
<sup>10</sup>Batomomu bakabinowa la bakabeisa ye mbeko itotina yeke bakelaka. Akaosa bo la akaka, ko bo ta bokibomoi la lina mbo Betesaida.<sup>11</sup>Ndjo ekalembelaka linginda ongoma, bakatuta ye. Akatukumaela bo la akasumulia libi lobeko lo Bokota boya Mungu, la akauwisa beke hambaka la yeme iyouwa.<sup>12</sup>Eko esuluwaka lowa, Baliou la baele bakaya linde la bakabeka linde mbo, faka linginda fofe mbo bake ta boki boke la mbele fangi la fangi loka lolalase la ola, loka mbo eke tombe ta lokpangebe.<sup>13</sup>Ndjo akabeka libo mbo, Enu fakai bo bieka biola. Bobalabeka mbo, Toiti la bieka bisiya sakolo ko beila liondo la suwe yele, ambo tokaoka oka sembela baito batotina bieka.<sup>14</sup>Loka mbo batolome bambaka lamba elefu

liondo. Akabeka la Baeki binde mbo, ngalisaka bo ta belenga tuku liondo tuku liondo.<sup>15</sup> Bakakela ongoma la bakangalisa baito batotina.<sup>16</sup> Akaosa beila biamo liondo la suwe yamo yele, la akamoila la likolo la akautchela- yo la akabuna- yo. Kolaongoma akafa yo la Baeki loka bate yo felo i linginda.<sup>17</sup> Bakala la baito batotina bakakuma soolo. La bakasondja tochungu liou la yele ta bikende bieke bitikalaka.<sup>18</sup> Oko embaka Yesu atosombola koye angene, baeki binde bambaka linde eseke lomoi, la akaiyola bo bo, Baito baatobeka kono mbo lombe ndai? <sup>19</sup>Bakabinoisela ye bonoko mbo, Yoani bolufi; basiya mbo Eliya; la Basya mbo amoi ta Banangoli ba kwala aofufuka.<sup>20</sup> Ndjo akabeka libo mbo, Enu ase otobekai mbo lombe ndai? Petelo akabinoisa bonoko mbo, Kilisito a Mungu.<sup>21</sup> Akakebesa bo la akalaka libo mbo baiweisaka buto ango amoi, <sup>22</sup>La akabeka mbo, iyundu la Wana a buto oena wale ta mbeko lokama, la ofekomo la batolioso ba boki, loitomo la ofufuka ta lisiso liasaso.<sup>23</sup> Akabeka aleko libo batotina mbo, ono ambe la yeme iyokenda mbisa yange, tikaka mbo afeke koni engene, la aose lieka linde lisiyo la lisiyo, la atutekei.<sup>24</sup> Loka mbo ono ambe la yeme iyowisa liwawi linde, atoseisa yo; la oni buto atoseisa liwawi linde loka lange, ye ndjo atouwisa amo.<sup>25</sup> Ono atoosa wenda bototina atoseisa yomba mbo akaosesela atomba la lini litina?<sup>26</sup> Loka mbo onu buto atooka sooni ta baoi bange, Wana a buto ambokelaka alekoye sooni oko etoya ye ta talaa inde, la Ise inde, la bakitomo batanu.<sup>27</sup> Ndjo ltobeka lino wéwé mbo bamoi bibo baemali eke batoena lingba tikani etoena bo Bokota boya Mungu.<sup>28</sup> Basiyo lamba bonanei mbisa i baoi be, akaosa Petelo la Yoani l Yakobo la akalila ta longo loka losombola.<sup>29</sup> Ekambaka ye atosombola, bomuna winde bo bombo bokakikowa, la tulu inde ikangenga la bofufou.<sup>30</sup> Batolomé baele bambaka batobekana linde, Mose la Eliya.<sup>31</sup> Bo bakaenena la talaa, la bambaka batobeka ta litomoi linde ye ikalingo oenganisa ye ta Yelusaleme.<sup>32</sup> Baiso ba Bapetelo bembaka la ilo, bakafowa la bakaena tala inde la batolomé bamo baele beke baemalaka linde eseke lomoi.<sup>33</sup> Oko eyananaka bo linde, Petelo akabeka la Yesu mbo, Boekesi, iyengani liso ongala eke, la ifondo mbo tokele bambau basaso, emoi loka lao, emoi loka loya Mose, la emoiloka loya Eliya. Akaluwa yeke itobeka ye.<sup>34</sup> Ekambaka ye atobeka ye mbeko, lifita lakaya oyaufa bo, la bakamba la bowa oko eotaka bo ta lifita.<sup>35</sup> Limiki likatomoa ta lifita mbo, Ono ambe Wana ange, Botshakolomu. Okakai ye! <sup>36</sup>Mbisa i limiki obeka, Yesu akaenena ko engene. Bo bakangala hai, la ta mbile amo baikabeisa buto lobeko aango lomoi ta yeke baenaka.<sup>37</sup> Ta lisiyo limbisa bakasulua ta lonngo, la likama li baito baka toamana linde.<sup>38</sup> Botolome amoi ta linginda akamama likama mbo, Boekesi, lolengila lao, tene wanaange botolome, loka ambe wana koamoi <sup>39</sup>Bolimo bobo atounda ye la mangu ye komama la ye kokusa ye la bolondi bokotomoa ye tabonoko, la mangu aitotika ye.<sup>40</sup> Lolengilaka la baeki bao mbo batomoise ye ndjo baitilonga otomoisa ye.<sup>41</sup> Yesu akabinoisa bonoko mbo, Enu bofindi boiti la limeli la liseseli! Lombe lino la botema bosa koata eni mbile? Yoko la wana ao eke.<sup>42</sup> Eko ekambaka ye atoya, bolimo bobo akakusa ye ta nyele, la akakutsha ye. Ndjo Yesu aka mamila bolimo bobo wamo, la akauwisa wana la akafa ye la ise inde.<sup>43</sup> Batotina bakamwala bofi boya Mungu. Oko embaka boya totina omwala ta mbeko yeke ikelaka ye, akabeka la baeki binde mbo, <sup>44</sup>Enu takai batoi bino ta baoi be, loka mbo Wana a buto atofomo ta bao ba baito.<sup>45</sup> Ndjo baitilembela litina li lobeko lamo. Isamelaka bo mbo bailuaka litina, la bakamba la bowa boiyola ye litina li lobeko lamo.<sup>46</sup> Fiye ikatomoa katikati ibo lamba ndai aeti bofi.<sup>47</sup> Yesu akalembela baenyeli ba botema wibo, la akaosa wainenge la akaemalisa ye fangi inde, <sup>48</sup>la akabeka libo mbo, Lamba ndai atotukumaela wainenge ono la lina liange, lamba aleko ndai ato tukumaeleli ao tuku maela Botomomu wange. Loka ono ambe boke ambenu ye oko ambe bofi.<sup>49</sup> Yoani akabinoisa bonoko mbo, Boekedi, toene buto amoi atotomoisa belimo bebe la lina liao, la tokafekila ye loka mbo atotuta eseke lomoi liso.<sup>50</sup> Yesu akabeka libo mbo, Oifekilakai ye, loka mbo atoemelenu ambe lino eseke lomoi.<sup>51</sup> Eko imbaka basiyo baya Yesu ake ta lobola ikaengana, akata bombo winde la bofilili oka ta Yelusaleme, <sup>52</sup>la akatoma Batomomu felo. Bakakoma ta boki bo Samalia loka bakomanyele ye eseke, <sup>53</sup>ndjo baikatukumela ye loka akambaka atomoila ndole oka ta Yelusaleme.<sup>54</sup> Ekaenaka baeki binde Yakobo la Yoani ongoma, bakabeka mbo Ngene, olangi mbo tote imbe ofoa ta lobola isuluwe la iite bo? <sup>55</sup>Ndjo akakikowa akammila bo, <sup>56</sup>la bakaka ta wenda bosiya.<sup>57</sup> Oko embaka bo batokenda ta ndole, buto amoi akabeka linde mbo, yomba mbo otoka ende, lototutowe.<sup>58</sup> Yesu akabeka linde mbo, nama iyokale imbe ta bakemba, la noli i lokonda bambe la ndowe, ndjo wana a buto aiti ango la eseke lota botswe.<sup>59</sup> Akabeka la buto asiya mbo, Tutekei! Ye akabeka mbo, fekei koni ndole loka okaselia ise ange.<sup>60</sup> Akabeka linde mbo, tikaka bangbei baselie bangbei lemo, ndjo owe kaka okanangola Bokota boya Mungu.<sup>61</sup> Buto asiya akabeka mbo, Ngene, lototutowe, ndjo tikekei koni lolakane la beke bambe ta mbele ango.<sup>62</sup> Yesu akabeka linde mbo, buto ono akata boo ta weli la atomoila la mbisa aiyengani la Bokota boya Mungu.

## 10

<sup>1</sup>Mbisa iyo, Ngene akatchakola aleko baeki tuku liambe, la akatoma bo baele baele felo inde ta beki befi betotina, la ta bilela bitotina bie asamaka loko. <sup>2</sup>Akabeka libo mbo: Eula lombe lofi, kolaongoma bakuwi bambe bake, totolelikela Ngene a eula mbo atome bakuwi ta eula.<sup>3</sup> Kakai lokendo; tene, lo'otome'nu kee bekoko felo ii koi. <sup>4</sup>Oitolakai ango tulu, kee litanga, kee bilato, la oifakai boto samo ao kalibo ta ndole.<sup>5</sup> Ta mbele isiya ye ot'otai, bekekei koni mbo: Eyai lombeke koni ta ene mbele. <sup>6</sup>Yomba mbo imbe la wana, a eyai, eyai lao lombeke ambe ye, yeiti alo, lokoinowa ambe'nu. <sup>7</sup>Ngalakai ta elo mbele elo, mwakai bieke bitofomo'nu; loka bakuwi baengani la bosombo, oiyotakai ta mbele la mbele.<sup>8</sup> Ta beki befi bemoi bie bito'otenu, la oko batonyange'nu, lakai bieka bie batofe'nu, <sup>9</sup>uwisakai baito ba biale beke otoanyai, la bekakai libo mbo: Bokota boya Mungu bombe tina lino.<sup>10</sup> Kola ongoma ta beki befi besiya bie bieito'ote'nu, bainyangeli'enu, ka-akai ta ndole, bekakai mbo: <sup>11</sup>To'ofufola ambe'nu ango nyele ii boki ye imbe ta batindi biso, la oluwe mbo bokota boya Mungu bombe tina. <sup>12</sup>La lobekile'nu mbo lobeko lo Sodomu lotomba la bofoka lamo kee tinga lo boki wamo.<sup>13</sup> Ngandi lao Kolaji! Ngandi lao Betesaida! Loka mbo lamba bakuwa ba bofoka baokelomo katikati ino bakuwa bakelomoko ta Tula la Sidona, ndjo ani bakikoliaka betema esiyo, la bangbalaka .... la buta bo imbe. <sup>14</sup>Lisiya lokambo lo Tula la Sidona itomba bofoka ta mbile ee

losambisomo le loiti lino. <sup>15</sup>Owe aleko Kapelanauma! Otoilama la likolo? Oto, otosuluwa ta eseke lo bangbei. <sup>16</sup>Ono ato'okenu ato'okeyi, la ono akambwelenu aosabwelei aleko; ndjo ono akasambwelei aosambwela botonomu wange. <sup>17</sup>Bo tuku bosambale bainowaka la liomali, la babekaka mbo: Ngene, ango bellimo bebe baolitisa esu loka lo lina liayo. <sup>18</sup>Abekaka libo mbo: Lokaenaka Satana lokpose la likolo kee ikalikali. <sup>19</sup>Tene, lo'osila ofe'nu bokota bo lomatelolo fele la tokpakpa, la bokota felo ii tala iya bokota wamo, la leka ango lomoi loimbo okisa enu wale. <sup>20</sup>Ango ongoma, oiyomalakai yeke mbo belimo beolitisa enu, ndjo omalakai mbo baina bino baosila osonomo ete likolo. <sup>21</sup>Ta mbile amo aomalaka la Bolimo Botanu, la abakaka mbo: Afa, Ngene a lobola la sekala, lo'osimolowe mbo ofoisa mbeko ii baito ba weli la baito ba loenyelo, la ofoenisa ambe bana bakikelike. Ko'ongoma Afa, loka mbo ifo'omaliso we ko'ongoma. <sup>22</sup>Bieka bitotina bifayomoko ei kola ise ange, la buto ailuwi ndai ambe Wana, Yeiti ko Afa, ndai aluwi Afa yeiti ko Wana la ono Wana alangi oenisa ye. <sup>23</sup>La akakikowa ambe Baeki, akabeka ta Buto la buto mbo: Liomali ta baiso be bakaena yeke okaenai! <sup>24</sup>Loka lobeka lino mbo betondoli likama la bekota bambe layeme ioena ye' enu okaenai la baikaena, la ooka ye itoke'nu, la baiyoki 'yo. <sup>25</sup>Boekesi amoi a bikela akaemala, la akabeka la Yesu, loka lookota ye mbo:Boekesi lowe, isani loka looshe liwawi li layaya? <sup>26</sup>Yesu akabeka linde: Ini isonomu ta lokasa lo bikela? Otangei isani ta yamo? <sup>27</sup>Akamutola mbo: Otosama Ngene, Mungu ao, ta botema wao bototina, ta bolimo wao bototina, ta bofoka wao bototina, la baenyeli bao batotina, la otosama bochaki lao lani esamiowe angene. <sup>28</sup>Yesu akabekela ye, limutoli liao limbe lilo; waka ongoma, la otouwa. <sup>29</sup>Ndjo ye, akalinga mbo alonge, la akabeka la Yesu: Ndai ambe nduku ange? <sup>30</sup>Yesu akabinoisela ye baoui, la akabeka mbo: Buto atofowa ta Yelusaleme atoka ta Yeliko. Akaoshamana la baito ba liyeye, bakafoya ye tulu, bakakucha ye, bakatika ye tinatina la lingba. <sup>31</sup>Kanga emoi akaeta kotandole amo, akaena buto ono, akaeta fangi esiya. <sup>32</sup>Molewi amoi, aka koma aleko ta eseke lamo, akafafa ndole. <sup>33</sup>Lisiolie limoi Musamaliya amoi ambe ta lokendo linde, ekomakae onga, akaokela ye ngandi ani aenaka ye. <sup>34</sup>Akaya tina linde, la akakanda bafwa binde, la loutoko ye baina la baana la akatola ye tiii kota eseke lo liuwisi, la akaosha liuwisi. <sup>35</sup>La nongo, akaosha falanga yele akafa bouwesi uwiselekei ye, la imba mbo isietela, lotofowe falanga isiya ta lobinoo lange. <sup>36</sup>Ndai ta bo basaso aengani omba bosamomu boya ono bokutchomu ta bao ba baito baliyeye? <sup>37</sup>Boekesi akamutola mbo: Ko'ono akakelela buto bolo, kola ongoma Yesu akabeka mbo: Akaaka la kelaka ongoma lisiya. <sup>38</sup>Oko ekaka Yesu ta ndole la baeki binde, akaota ta boki bomoi bokikelike, la botaali amoi, ako Malata, akanyengela ye ta mbele inde. <sup>39</sup>Malata ambaka la etungani linde ako Maliya angalakase ta bakolo baya Ngene, loka aoke baoui baya Yesu. <sup>40</sup>Malata aka'angaika loka lo bakuwa likama, akaemala felo inde, akabeka mbo: Ngene, otoena tale mbo etungani lange atikei eiyangene lokomanye bieka? Bekelaka ye aya sungei. <sup>41</sup>Ngene akamutola ye mbo: Malata, Malata, otowangaika la loto baenyeli ta mbeko likama. <sup>42</sup>Leka ango lomoi lombe la litina. Maliya asiosa leka lolo le loiti la kanda eosela ye.

## 11

<sup>1</sup>Yesu ambaka atosombola ta eske lomoi,okoesilisaka ye, amoi ta Baeki akabeka linde mbo, Ngene, ekisekesu losombolo, ani ekisaka la Yoani Baeki binde. <sup>2</sup>Akabeka libo bo, oko etosombolenu, bekakai mbo: Afa! lina liao limbe botanu, la bokta wao boye. <sup>3</sup>Feke'su boila boengani lisiyo la lisiyo; <sup>4</sup>Mesilekesu bobo wisu, loka esu totomesila aleko batotina beke bambe la bolima wisu. Oiyotisekesu ta bakoteli. <sup>5</sup>Akabeka libo lisiya mbo, yomba mbo amoi ino ambe la buto linde aokoma ambe ye katikati i lotiyo, la ekobeka linde mbo, buto lange, sungekei la beila besaso, <sup>6</sup>Loka buto lange asiya ambe ete embei ta lokendo, loiti la leka losela imbu felo inde. <sup>7</sup>Lambo eko binoisela ye limiki ta katikati e mbele mbo, Ndo kelei ito. Boinda bosila olikomo, la bana bange bambe lange ta litamba. Loiyengani ale otomowa loka lofo yo. <sup>8</sup>Lotobeka lino mbo imbe atotomoa lokalofa ye loka aimbaka nduku inde, atotomoa ofa linde itotina yeke ambe la yeme loka aiti la sooni. <sup>9</sup>Ei lotobeka lino mbo, lengilaka la itofomo lino. <sup>10</sup>Loka bolengeli la bolengeli atoanya, bolingi atoanya, la itolikolomo ta ono atouma. <sup>11</sup>Yomba mbo wana aya moi ino atolengila suwe ambe ise nde, ekofa ye fele ta eseke lo suwe? <sup>12</sup>Yomba mbo atolengila like, ekofa ye ikpakpa? <sup>13</sup>Kolaongoma yomba ombo enu baito babe baluwi ofa bana bibo baano balo, Afa iso a likolo aitofa Bolimo Botanu ta beke baka lengila? <sup>14</sup>Ambaka atofowa bolimo bobo. Bolimo wamo bombaka bo ebebe. Eko etomoaka bolimo bobo, ebebe akabeka la likama li baito bakamwala. <sup>15</sup>Bamoi bibo bakabeka mbo, aotomoisa bolimo bobo la bofoka boya Belejebula ngene a belimo bebe. <sup>16</sup>Ndjo basiya loka lokota ye, bakalengila ndembe eofowa tla likolo. <sup>17</sup>Eluaka ye baenyeli bibo, la akabeka libo mbo, Bokota la bokota we bokaosila owanana botoseisama, la mbele ene ekaowanana, etoukowa. <sup>18</sup>Yomba mbo Satana anani katikati inde, bokota winde botoemala kola isani? Loka obekai mbo lotomoisa bolimo bobo la bofoka boya Belejebula. <sup>19</sup>Yomba mbo ei lofoye belimo bebe la bofoka boya Belejebula, bana bino batomoise ase belimo bebe la bofoka boya ndai? Bo batomba batosambisesu. <sup>20</sup>Yomba mbo lofoye belimo bebe la inekele iya Mungu, bokta boya Mungu botomoelenu. <sup>21</sup>Yomba mbo buto angbulu la nguwa inde atokuka mbele inde, biengo bikukomu laweli. <sup>22</sup>Eko etoya buto asiya a ngbulu ono aeti ye la ngbulu, la ekobuna ye, eko foya nguwa inde yeke atelaka botema, la ekoana biengo binde. <sup>23</sup>Ono aiti lange eseke lomoi atoemaelei, la ono aitokuka eseke lomoi lange atomeanisa. <sup>24</sup>Tambile etofowa bolimo bobo ambe buto, atokendakenda ta biseke biomeli atolinga etchuelo lo lienia; la eitoanya ye, ekobeka mbo, lotobinowa ta mbele elo ekatomoekei. <sup>25</sup>Ekoyanya amo ekaosila ombomo la okomanyomo. <sup>26</sup>Mbisa ekoka okaosa belimo bebe besiya bosambale beke baeti ye la bobo, bokota ongalase onga. Bomuna bo buto amo botomba la tale kooeta kanda ene efelo. <sup>27</sup>Oko embaka ye atobeka mbeko ye, botaali amoi ta lingida akaila limiki, la akabeka linde mbo, liomali la soolo ene eka botowe la balomi beke bamwesoko'we. <sup>28</sup>Ye akabeka mbo, liomali limbe ambe be bakaoka Lioi liya Mungu la baolitisa yo. <sup>29</sup>Linginda li baito bekatikala ta litoamani, Yesu akakola obeka mbo, Bofindi we bombe bofindi bobo. Batolinga ndembe, la ndembe eimbofomo libo koene ndembe eya Yona. <sup>30</sup>Kanda emoi ani embe Yoani ndembe ta

baito ba Niniwe, ko ongoma aleko etomba wana a buto ndeme ta bofindi we.<sup>31</sup> Bokta botaali ta boki bo mbole atofufuka ta mbile e litenomu eseke lomoi la batolomé ba bofindi we, la atosuluwisa bo, loka mbo afoaka ta liko li boki oyaoka weli boya Solomo, tene, ono aeti Solomo ambe.<sup>32</sup> Batolomé ba Niniwe batoemala la we bofindi eseke lomoi ta litenomu la batosuluwisa bo, loka bakikole betema bibo ta inangoli iya Yona, tene buto ono akaeta Yona ambe.<sup>33</sup> Buto ono akabanisa tala aimbota amo ta eseke loisami, ndjo atota amo likolo ta etelo lo tala loka beke batoota baene liangangi liamo.<sup>34</sup> Liso liao limbe tala e bindo. Yomba mbo liso liyao limbe lilo, bindo biao bitotina bimbe lowa. Ikaomba bobbe, la bindo biao bitotina bimbe lilima.<sup>35</sup> Kebaka mbo lowa le lombe katikati ao liembaka lilima.<sup>36</sup> Yomba mbo bindo biao bitotina la lowa, ndoenango iniyo i lilima, yamo itotina itomba la lowa kee tala ene etobana la liangangi .<sup>37</sup> Oko embaka ye atobeka, Mofalisai amoi akata ye mbo bale bieka. Akaota la akala,<sup>38</sup> la ekaenaka Mofalisai amo, akamwala mbo aola bieka ndo soola bao.<sup>39</sup> Ndjo Ngene akabeka linde mbo, kanikai enu Bafalisai oto tanisai lousa lino la kopo la saani e baye, ndjo aiteni ino iwali la bolefe la bobbe.<sup>40</sup> Bibebe! ono akakela yo, imbe lousa, aika kela aleko la munga? <sup>41</sup>Fakai ndjo yeke imbelamunga kee liano li ngandi, la mangu bieka bitotina bino bimbe botanu.<sup>42</sup> Ndjo ngandi lino Bafalisai! loka mbo otoesai botuku bo liou endiosomo, la mpegana, la totaki tototina, la ototikai Lingani la losamo loya Mungu. Ikaenganaka lino okela koni liyengani la losamo loya Mungu la oeno okela mbeko isiya aleko.<sup>43</sup> Ngandi lino bafalisai! loka mbo otolangai ko bingaelo bi lokuku ta bituanelo, la kalibo ta baongo. <sup>44</sup>Ngandi lino! loka ombei kee mbila yeke yeitoenena, la baito baokenda likolo liamo la baito lembela.<sup>45</sup> Amoi ta baekesi ba bikela akabeka linde mbo, Boekesi, etobekowe ye mbeko, otoseole esu.<sup>46</sup> Akabeka mbo ngandi lino baekesi ba bikela! loka mbo ofofai baito belito bembe la bofoka loilo, la enu aleko oitoengani ango ounda yo la tonekele tshuino.<sup>47</sup> Ngandi lino! loka mbo oshwai mbila i banangoli, ndjo bangau bino baitaka bo.<sup>48</sup> Kolaongoma obekelai loka lo bakuwa ba bangau bino, la ofoimilai yo, loka bo baitaka bo ndjoenu okashwai mbila ibo.<sup>49</sup> Yamo yo weli boya Mungu akabeka mbo, lototomela bo banangoli la batomomu, batoita bamoi bibo la batoenisa basiya bemusi,<sup>50</sup> loka mbo ngelo i banangoli batotina ye ikautama se oakola ta liako li wenda, baiyolomo ta bofini we. <sup>51</sup>kota ngelo iya Abele tii kota ngelo iya Jekalia ono aitomoko katikati i Etumbelo lo liano ta mbele. Lobeka lino wewe mbo, batoiyolomo ta bao ba we bofindi.<sup>52</sup> Ngandi lino baekesi ba tokela! loka mbo ofoyai fungola e weli; enu kabisa oiyoti ango, la ofekilai baito beke bakambaka la yeme mbo baote.<sup>53</sup> Ekafoaka ye onga, Bandiki la Bafalisai bakakola osoma linde la bakaiyola ye litina li mbeko likama,<sup>54</sup> Kolaongoma bakakota okomanyela ye ilonga loka lounda ye ta baoi binde.

## 12

<sup>1</sup>Tambile amo, baito likamabamkaka eseke lomoi, bambaka batomatekelana, Yesu akakola obeka felo i Baeki binde mbo, Kebakai la fulu e Bafalisai, yeke imbe lolanga.<sup>2</sup> Yeiti la leka ango lomoi le loisami mbo loimbo enena, la yeke isami mbo yeimboluamana. <sup>3</sup>Kolaongoma, itotina yeke otobekai ta lilima itokana ta fololo, la yeke otobekai ta litoi katikati i mbele itonangolomo likolo li mbele. <sup>4</sup>Lotobeka lino be ombei bangani bange mbo: Oibangakai be batoita bindo, lambisa iyonga, baiyengani okela leka ango lomoi loeta. <sup>5</sup>Lotoenisenu ndai oengani obangai. <sup>6</sup>Baitoungisa noli ikikelike liondo la bingbende biele? Kolaongoma, ango amoi iso aitosolomofelo iya Mungu. <sup>7</sup>Kola sowe ino ii botchwé itangomu. Oibangakai ango: Ombei la lokuku koeta yo noli ikikelike. <sup>8</sup>Lobeka lino, ono atobeka lange felo ii baito, wana a buto atobekela aleko ye felo ii Bakeitomo baya Mungu. <sup>9</sup> Lambo ono atofekei felo ii baito atofekomo felo ii Bakitomo baya Mungu. <sup>10</sup>La ono atobeka bobbe oemaela wana aya buto, itomesilomo- we; la ono atomola Bolimo Botanu yeimbomesilomo ye ango. <sup>11</sup>Mbile batokesenu felo ii bisangamelo, bakumi la bekota, oiyenyelakai ango ani otobekai la okela, <sup>12</sup>Loka Bolimo Botanu atoekisenu tambile yeke iyengani lino obeka. <sup>13</sup> Buto amoi akabeka la Yesu, katikati ii linginda mbo: Ngene, bekaka la nduku ange ane lange bondanda wiso. <sup>14</sup>Yesu akabinoisela ye mbo, o buto, ndai akatei loka lombabokumi wino, la loka lowe liyano lino? <sup>15</sup>La akabeka libo mbo: Kebakai la weli loka lo baenyeli batotina babe; loka liwawi li buto liyeti loka lo biengo binde, ambe ende layo likama. <sup>16</sup> Akabeka libo bombila we mbo: Nele i buto amoi a lifoka ikabotaka mbeku likama. <sup>17</sup>La akabeka ta botema winde angene mbo: Lotowa isani? Loka oiti la esekeloaota biengo biange. <sup>18</sup>Tene, akabeka, loaatokela ani: Lotobuna likula liange li feloaa, lotoshwa lisiya lifilifi, la lotootisa bieka laaa biengo biange bitotina; <sup>19</sup>La lotobeka la bolimo wange, ombe la bieka likama bimbe loka lo miaka ibule, heumaka, laka, mwaka, la omalaka. <sup>20</sup>Mungu akabeka linde mbo: Ebebe! kole lotiyo, batolinga Bolimo wao; la yeke okakomanya, bitotikala la ndai? <sup>21</sup>Imbe aleko ongoma loka loya ono atoisa biengo loka linde angene, la aiti lifoka ambe Mungu. <sup>22</sup>Yesu akabeka la Baeki binde mbo: Kolayamo lotobeka lino mbo: Ndo mbai la baenyeli loka loyeke oengani obatai. <sup>23</sup>Loka liwawi lieti bieka, la bindo bieti tulu. <sup>24</sup>Enyelisaka noli ii likolo mbo baimbo lobaka la baimbobunaka, la baiti la eiselo lamba eseke lo'otela, ndjo Mungu atolesaka bo. Enu oetii loketi lo noli likama! <sup>25</sup>Katikati ino ndai aengani lotaliyo lisiyo limoi ta liwawi linde loka lo lotungisano bobeta? <sup>26</sup>Yomba mbo oiti la bofoka ta be bieka bieke, loka loingi otoeya-eyai loka lo mbeko isiya? <sup>27</sup>Moilakai koni batunda ba lokonda batotomowa: Baitowaka likuwa, la baitosolaka bo tulu. La'ni lotobekalino mbo imbe ende Salomona ta bokota winde aikamba la tulu ilo oengana la bee batunda. <sup>28</sup>Yomba mbo Mungu atobatisa koni liwa li lokonda, yeke imbe la boni la elongo itokusomo ta imbe, ye aiyengani obatise'nu? Ooh, liimeli lino likombe like. <sup>29</sup>Oimbakai la baenyeli loka loyeke oenganiolai la yeke otomwai, la oimbakai la baenyeli loka loyo. <sup>30</sup>Bio bieka bitotina, bapakano ba we wenda ndjo bambe layo la yeme. La Ise ino aluwi yeke ombei layo la yeme. <sup>31</sup>La lingakai koni felofelo bokota boya Mungu, itotina itofomo lino lambisa. <sup>32</sup>Oimbakai la bowa, esondjamelo loko! Loka ifo'omalisa Ise ino loka lofe'nu bokota. <sup>33</sup>Tchambitchakai yeke ombei layo, la anelakai yo ta tobube. Wakai loka lino litamga li falanga lieke liyeitotobeya la isakai biengo bilo bi loketi ta lobola, elo yeiti la wiba, la yeiti la mbalala, la solila, lamba kpalala yeimbo koma. <sup>34</sup>Loka oko embe biongo bino bi litina, botema

wino bombe aleko onga.<sup>35</sup>Tikalaki la tulu ii lokonda, baanisakai tala ino.<sup>36</sup>Mbakai kee bakuwi bee batoumbakela Ngene ibo akaka loka lo libala. Ta mbile etoya ye atouma ta boinda, la batolikola ye.<sup>37</sup>Liomali, ta bekowa bee, ta mile etoya Ngene, ato'osha bo batoumbakela! Lotobeka lino ta wewe mbo, onoatomba la tulu ii lokonda atosela bo ta mesa inde la atoya loka lo'okela bo.<sup>38</sup>Lamba eni mbile atoya, lamba aiteni ee lotiyo, lamba ta mbile ee isaso ee nongo, liomali ta bo bekowa ato'osha bo batomoila.<sup>39</sup>Luwakai la weli mbo: Yomba mbo Ngene a mbele akaluwaka eni mbile etoya wiba, ani aumbakele, ani endo tika mbo abune.<sup>40</sup>Enu aleko, mbakai la weli, loka Wana buto atoya ta mbile ene oitoluwai.<sup>41</sup>Petelo akabeka linde mbo: Ngene, ambe'su ndjo otobeka bombila we, lamba ta batotina?<sup>42</sup>La Ngene akabeka linde mbo: Ndai ambe bokowa bo momongo ono Ngene akafa ye likuwa ta baito bindeloka afe amoi la amoi beika ta mbile ene e'engani?<sup>43</sup>Liomali ambe bokowa ono ta loyo loya Ngene inde atokela kani abekaka linde mbo akele.<sup>44</sup>Wewe, lotobeise'nu, Ngene inde atofa yebokota ta yeke itotina ambe lamo.<sup>45</sup>La yomba mbo oko bokowa ekobeka mbo: Ngene ange aitakamba la loyo, la ye kowa kola oenisa wale ta bekowa batolome la bekowa betaali, lomwo, lili, la lolewo,<sup>46</sup>Ngene inde, atoya ta mbile ene aiti ango la baenyeli, la ta lisiyo lie aitoumbakela. La Ngene inde atofa ye likutchi lifi, la atokela ye kee ani etokelaka bo ta bekowa bebe.<sup>47</sup>Bokowa ono aluwi okela lisangi liya Ngene inde, la aitokela ongoma, la aikeli lisangi liya Ngene inde, ato'osha likutchi li bofili.<sup>48</sup>La ono ailuwi lisangi liya Ngene inde, atoumomo aleko la bofili iniyo. Yomba mbo buto ambe la ibule batolengila ye ibule, la ono bakafa ye likama, atomba aleko la likama.<sup>49</sup>Lo'oya oyakusa imbe ta wenda, lombe ase la yeme ii ingi ani ikaosila obaana?<sup>50</sup>Imbe la lilufi limoi liyengani olufiomo, lombe la yeme iyenganisomo!<sup>51</sup>Otoenyela mbo loye oyata kimia ta wenda? Yeiti ongoma kanga lianani.<sup>52</sup>Kola yamo, kanikani liondo ta mbele emoi batoanana, basaso botoemaela baele, la baele batoemaela basaso,<sup>53</sup>ise atoemaela wana, la wana atoemaela ise, ima atoemaela wana, la wana botaali atoemaela inango inde, boilana la boali a wana, la boali a wana atoemaela boilana.<sup>54</sup>Akabeka aleko la linginda: Ta mbile otoenai lifita litoemala, otobekai mbo: Ndaluke etoya'se. La yamo itokoma.<sup>55</sup>Okafoenai lofofo ta ifitika, enu kobeka mbo: itomba la efufa. La itomba amboko ongoma.<sup>56</sup>Baito ba lolanga, oluwi oetekanisa bonuna bo wenda la lobola; eni kanda oitoluwai ene mbile?<sup>57</sup>La loka loingi oitoluwai enu angene yeke imbe ilo?<sup>58</sup>Ta mbile otoka la boiyani wao felo ii bakumi, kelaka mbo osilane linde ta ndole, loka mbo aitokokowe ta bakumi, la bakumi baitokokowe ambe sola la sola aikesokowe ta bonyololo.<sup>59</sup>Lotobeka lao, oitotomowa ani oitaka lipa lofalanga lomoi.

### 13

<sup>1</sup>Baito basia bakambaka ongo ta mbile amo ba beisakaye lobeko lo Bagalilai beke Pilato asondjaka ngelo ibo loka lo liano.  
<sup>2</sup>Akainoisela bo mbo, oenyelai mbo Bagalilai yamo basieta baito batotina la bobo lokambo baosilösha biale yamo?<sup>3</sup>Lobeka lino mbo, otokelai, kolangoma oikikoli bawawi, enu atotina otongbai ongoma.<sup>4</sup>Lokalo ongoma loka libo liou la bonanei beke mbele isa la loselamo ekaukowaka libo la ikaita bo, osienyelai mbo bo basiete baito batotina bangali ta Yelusaleme la bobo?<sup>5</sup>Lobeka lino mbo, kolaongoma oikikoli bawawi, enu atotina otongbai ongoma.<sup>6</sup>Yesu akabeka la bombila weke mbo, buto amoi alobaka isandu iko mosuke ta elanga linde lo bako, akaya oya luka tuma tayamo aikaosha.<sup>7</sup>Akabeka la bakuki ba elanga mbo, kanikani loya oyaluka yuma isuke yeke miaka isaso ongoma loitocha. Tenaka yo itoama nyele bule loka loingi?<sup>8</sup>Bokuki akasanoela bo, Ngene, tikaka yo ta mwaka we ikonde, kolaongoma loto'osha fangi itotina, la lo'okusa tobi onga.<sup>9</sup>Kamba eiboti tuma ta mwaka botoya. Yeiti ongoma, ototena yo.<sup>10</sup>Akambaka loeniso la amoi ta bisondjanelo bi Sabata.<sup>11</sup>Botaali amoi ambaka la bolimo bolilewi miaka liou la bonanei, bindo binde bika inyama la ongoma eikalua ale loinyamo.<sup>12</sup>Yesu akaenaye la akatayeloi ongoma akabeka mbo, Ima osilo'uwa la lilewi lia.<sup>13</sup>Akatela ye baö, la aka'emala mala emoi, ongoma aka'inoisela Mungu kekeleke.<sup>14</sup>Bokota bo esondjanelo akasoma lokambo Yesu asiuwisa ta Sabata, ongoma akabeka likama mbo: Basio basiengana liambe bisiengana lowo likuwa. La ongoma yokoi owisomoi ta basio bamo ongoma tinga ta lisio li Sabata.<sup>15</sup>Ngene akainoisa bonoko mbo, baito ba nanga! Amoi la amoi ino mbo fungolaka elelo lo nama inde, loka aya mwese yo baye lisiyo li Sabata?<sup>16</sup>Botaali weke ambe wana aya Abalayama, ono Satana akandiye miaka liou la bonanei, iengane mbo afoyomoko ta boliki winde weke ta lisiyo li Sabata mboi?<sup>17</sup>Esilisakaë lobeko mbeko ye baemaeli binde batotina bakaena soni, ongoma likama likulu bakambaka lo'omalo la mbeko itotina ilo ikakelomo ta bao binde, bembila be yuma ii sinapo la fulu.<sup>18</sup>Kolaongoma Yesu akabeka mbo: Bokata boya Mungu bombeke ingi, la loenganise wo la ingi?<sup>19</sup>Bombeke yuma isinapo, yeke buto akaosa la akaka lokaloba ta elanga linde, yo'okonda la yo'okoma isandu, ongoma noli ii lokonda baongala ta betaä binde.<sup>20</sup>Akabeka lisia mbo: Loenganise bokota boya Mungu la ingi?<sup>21</sup>Bombeke fulu weke bataali akaosa la akaisa atiteni ee bipelo mbisa ibefulu, kombile itotomowa yo itotina.<sup>22</sup>Yesu akaetaka ta beki befi la beki beke, la ani atokisa, ani atoka ta Yelusaleme.<sup>23</sup>Buto amoi akabeka linde mbo: Ngene, yeiti la baito iniyo batouwisomo? Akasanoela bo: <sup>24</sup>Wakaï bofoka o'otei ta boinda bokikelike. Loka, lobeke lino likama olukei lo'oto, la baitoengana.<sup>25</sup>La ambe boekesi bo mbele aosilo oemala lokando boinda, la oandja loemalo lousa euma boinda, la obeka mbo: Ngene sombulaka loka liso! Atoinoisele enu bonoko mbo: Loilui enu, kamba o'ofowai endeï.<sup>26</sup>Kolaongoma bato akola lobeko mbo: Toka laka la to kamwaka felo yao, la okaekisaka ta ndole iso.<sup>27</sup>La akamutola: Lotebeka, loiluwi kamba o'ofowai endeï, fakai lange, enu batotina bakeli ba bobo.<sup>28</sup>Bileli la losio baino batongala ongo, kamba otoenai Abalayama, la Isaka, la Yakobo, la banangoli batotina aiteni e bokota boya Mungu, ongoma enu oto'tomoisomoi lousa.<sup>29</sup>Atoya ta biseke bi etomoelo la mbile, ta biseke bi likolo la mbole, la batongala ta bokota boya Mungu.<sup>30</sup>La moilakai, ba mbisa batongala felo, be bafelo batongala mbisa.<sup>31</sup>Ta lisiyo liamo, Bafalisa basiya bakaya ambe ye, ongoma bakabeka mbo: Fowaka eke, la kaaka, loka mbo Elode ambe la yeme iyoitowe.<sup>32</sup>Akamutoela bo mbo: Kakai okabekai la nama a bakolo amo mbo: Laboni lo'obeka lotofoya belimo bebe, la ongoma lotouwisa baito ba biale, lasiyo litoya lotokoma ta liko.<sup>33</sup>Kola ongoma iyengani lange lokende laboni la elongo la basio batoya ongoma mbo

iyangani mbo bonangoli aingbaka eseke losiya, kanga ta Yelusaleme.<sup>34</sup>Yelusaleme, Yelusaleme, owe ono otoitaka banangoli ongoma otouma la babuki beki boto'umomo ambowe, mbile ibule lokambaka la yeme iyosela bana bao kanda emoi kee koko atoselaka bofindi winde sekala ii bambembe binde, la ongoma oikambakai la yeme.<sup>35</sup>Tene mbele ino etotikala, la lo'obeka lino mbo: Ono atoya la lina liya Ngene autchelomoko.

## 14

<sup>1</sup>Atoka lisiyo limoi ta Sabata,ta mbele ebokota bomoi bo Bafalisai,loka loola bieka ,bakamoilaye. <sup>2</sup>La moilaka buto amoi akambaka lawale bo fela akambaka ongo felo inde. <sup>3</sup>Yesu akabeka boekesi bo bikela la Bafalisai mbo,ta lisiyo liSabata louwiso buto iengani komba. <sup>4</sup>Akangala ai aka osaye la akauwisae ongoma akafae ndole. <sup>5</sup>La akabeka ;kamba wana komba ngombe eni buto atitene ino akaya oya kusama ta likemba,aitomomoisaë mangu ta lisiyo liSabata? <sup>6</sup>La baikalonga ango oinoiselaye ta mbeko yamo. <sup>7</sup>Oka ekaenaka Yesu mbo,batanu bambe looso libonga lilokuku,akabeka libo bombila mbo, <sup>8</sup>Kamba otomo la buto amoi ta liamo lilibala,oitongala ta libonga lieti la lokuku,loka lomba la bowa kamba buto asia aeti owe la lokuku aosila otoma linde, <sup>9</sup>La ono akate'enu atoya oya beka lino mbo,faka buto ono eseke, la likuwa ongoma otoandja looko soni losa eseke lombisa momongo. <sup>10</sup>Kolaongoma,akatomo,kaaka okangala ta libonga limbisa omongo,la omongo kamba Ngene akatowe atoya, atobeka lao mbo,buto lange etaka elo felo;ongoma lokuku lotongala ta baiso ba baito batotina batola lao eseke lomoi. <sup>11</sup>Lokambo ono atosela lokuku,lokuku linde lotofoa,la ono aofeka lokuku,lokuku linde lotangala lofi. <sup>12</sup>Aka beka aloko la ono akatomoko;kamba okaokela lolo la ningo kamba bieka bilikolase,oitaka baito lao kamba basamomu bao kamba baluaini lao kamba baito ba bieto ibube ba tina lao oto,mbo ba tewa lisia la oimilaka. <sup>13</sup>Kolaongoma akaokela bieke ,taka baito baiti la leka,la bitukulu,la baito ba bilema,la baito ba botutu. <sup>14</sup>Ongoma otomba la liomali loka mbo baito longa loinoiselo eë lisia oto,lokambo otoosha lilipomu atiteni elifoi ta nyele ibaito babe la baito ba fololo iya Mungu. <sup>15</sup>Amoi ibo bakambaka lolo bieka eseke lomoi linde akaokaka baöi beke Yesu akabeka linde mbo,la ono atola libinga atiteni ibokota bo ya Mungu! <sup>16</sup>La Yesu akamutoelaë mbo;buto amoi aka komanya bieke bifi,la akata baito likama. <sup>17</sup>Ta mbile ebieka byamo akatoma bokowa winde obeka la bekeke mbo,yokoi lokambo biosila oengana. <sup>18</sup>Amoi amoi ibo ototina basiandja lofeko,ono afelo aobeka linde mbo,lo osomba elanga,ongoma engani lange lofoo okamoila yo,lolengilo mbo oimilelei loko. <sup>19</sup>Asiya akabeka mbo,lo osomba belome lome liondo bi ngombe la engani lange loka lopima bo lolengile eë okelei imbu. <sup>20</sup>Asia aobekambo,loosonga bataali,yamoyo yeiyangani langi loyo. <sup>21</sup>Bokowa wamo asi'inowa losemwela ngene inde mbeko yamo la liko boemaeli bombele aka oko lisomi,laongoma akabeka labokowa winde mbo,foaka kanikani atiteni endole ifi,la tondole ndole to boki,ongoma esakae eke baito bakasila bitukulu, la baito ba bilema. <sup>22</sup>Bokowa aobeka mbo,ngene ikabekokowe yosilo okelomo,ongoma eseke lokombe koni. <sup>23</sup>Ngene akabeka labokowa mbo,foaka atiteni endole, la biseke ongoma otisaka boo likama mbo mbele ange ewale la baito. <sup>24</sup>Lokambo lobeka lino mbo buto ango amoi ibo bakatomo atola ango inio ibieka yange. <sup>25</sup>Embili lo baito bakambaka losondjamana linde.akakikowa ongoma akabeka libo mbo, <sup>26</sup>La amoi aoya ambei aiyani la Ise inde la Inango inde la bana binde la baito linde batolomo labawelo binde bataali la liwawi lio aiyangani ombo boeki wange. <sup>27</sup>Ono aitoli lieka liange la aikatutei aiyangani omba boeki wange. <sup>28</sup>Lokambo buto amoi atiteni ino ambe layeme ioshoâ mbele,atongala felo loosho kamba iyangani looso bieto yamo loka losilisa yamo? <sup>29</sup>Yeiti ongoma,ato akola ota bakemba,loka mbo aiyangani losiliso yamo,bo atotina bato moilayo batoandja losekoe, <sup>30</sup>Buto ono akakola oshawa aikalongaka osilisa. <sup>31</sup>Lisiya bokota amoi atoka okananisa bokota bosia bitumba,atoakola felo loenyelo kamba la baito miliale liou atoengana loemaelo ono atoya linde la baito miliale tukuye? <sup>32</sup>Kamba eiyangani koni,la ani ekombe oko esika,atotoma batondoli okaiyola mbeko lalilateni. <sup>33</sup>Kolaongoma ango buto la buto ta atiteni ino aïtofeke bibongo bitotina bimbe linde,ai engani ongola boeki wanga. <sup>34</sup>Bokpa bombe bolo, yombambo loete lo bokpa lo osila, yamo ito'osha loete la ingi? <sup>35</sup>Ei'engani la nyele, kamba la lifuma litobi, ongoma batokusayo lousa. Osalakai mbo ono ambe la batoi baoka aoke.

## 15

<sup>1</sup>Basondji ba bakute be wenda, la baito ba bobo bakambaka bo atotina loyo ambe Yesu loka lo'okaye. <sup>2</sup>La Bafalisai la basoni kasa bakambaka lobeko mbeko iniyo iniyo mbisa inde likama mbo: Buto ono afo'omala loyambo baito bobo la ongoma atolala libo bieka eseke lomoi. <sup>3</sup>Akabeka libo bombila we mbo: <sup>4</sup>Lamba buto amoi ino ambe la bekoko mia, ongoma bomoi ibo bokaobunga, atotika bo tuku libwa la libwa atiteni ii liombe, kola ongoma aitoka okalinga weke bokabunga kombile eto'osha ye wamo? <sup>5</sup>Ekaosila o'osha ye wamo, atota wo ta batoto binde la liomali, <sup>6</sup>ongoma etoinowa ye ta mbile atosela bee amoi la basiya, kola ongoma atobeka libo mbo: Omalakai lange, loka mbo losi'osha bokoko wange we bokabungaka. <sup>7</sup>Lo'obeka lino mbo:Ongoma liomali litongala atiteni ii lobola loka lo buto amoi a bobo ono atokikolia liwawi itoeta liomali loka lo baengani tuku libwa la libwa beke baiti la yeme iyokikolia botema. <sup>8</sup>Lisiya lamba botaali amoi ambe la touma to bakute liou, lamba aleko atokomya yuma imoi, ato'sa lopambolo tala la lo'ombo mbele la atolukaluka kota mbile ene ye aitoanya? <sup>9</sup>Ekaosila ye lo'anyo, atongalisa baito linde la kendisani inde, la atobeka mbo: Omalaka lange, lokambo lofoanya yuma yeka akabungaka. <sup>10</sup>Lo'obeka lino mbo: Liomali litomba ongoma aiteni ii bakitomo baya Mungu loka lo buto amoi ono a bobo ono akakikolia botema. <sup>11</sup>Atobeka loka mbo: Buto amoi akambaka la bana batolome baele. <sup>12</sup>Ono a mbisa aiteni ibo akabeka la ise inde mbo: Afa, fekei iniyo ii bibongo bitoengana lange. Aka anela bo bibongo binde. <sup>13</sup>La liko li basiyo iniyo ango, wana a liko akakanda bibongo bitotina, ongoma akaka ta boki bosiya bo esika, la akaseisa bibongo binde oko ekaka ye ta lokendo la baenyeli baike. <sup>14</sup>Oko esilaka ye bibongo binde bitotina, semba efi aleko ekatomowa ta boki wamo, ye aleko aka'akola lotchango bibongo. <sup>15</sup>Kola ongoma akaka la aka'anya likuwa ambe buto

a boki bo wenda wamo, la akatoma ye ta bilanga binde loka lo loleso nama ikumo ngulube. <sup>16</sup>Akamba la yeme ii lowaliso solo inde la mbso yeke nama ikumo ngulube batola, la buto aikafayaka ye ango leka. <sup>17</sup>Aka enyela ta liwawi la abeka mbo: Bakuwi ba lilipomu baya ise ange likama bambe la beila beike. Kani ei lo'ongba la semba eke. <sup>18</sup>Lotofowa la lotoka ambe ise ange, ongoma lotobeka linde mbo: Afa, lo'okelela lobola bobo, lo'okela bobo ta baiso bao, <sup>19</sup>loiyengani ale otomo wana ao lisiya, selekei kee amoi a bakuwi bao ba lipimomu. <sup>20</sup>Akafowa, la akakoma ambe ise ende aleko. Kola ongoma la ani akombe esika, ise akaena ye la akaokela ye ngandi; akaka mangu la akatukumaela ye la akaloma ye likeka ani ongoma imbe ndembe ee losamo. <sup>21</sup>Wana inde aleko akabeka linde mbo: Afa lo'okela bobo ambe lobola, la lo'okela aleko bobo ta baiso bao, loiyengani ale lotomo wana ao lisiya. <sup>22</sup>Afa aleko akabeka la bekowa binde mbo: Yokoi la tulu ene e'eti itotina la bolo kani kani lotobatisa ye, la taka ye ikomo ii loketi ta inekele, ongoma batisaka ye aleko lipapa ta bakolo binde, <sup>23</sup>kola ongoma yokoi la wana a bokoko ono ambe la baina la ongoma itakai wo, loka tole, la to'omale, <sup>24</sup>lokambo wana ange ono eke akambaka bolioy ongoma akombe la liwawi lisiya: Akambaka bobungi ongoma afoenena. Baka'akola lo'omalo onga. <sup>25</sup>Ongoma wana inde a felo-felo akambaka ta mbele akaoka be'ele la lobilo lo bisha. <sup>26</sup>Akata amoi a bakuwi ambe ye, la akaiyola ye lamba ini mbeko yeke itoeta imbe ini. <sup>27</sup>Ye aleko akabeisa ye mbo: Nduku ao aoya, ongoma ise ao akaita wana a bokoko a baina loka mbo asio'anya ye la bindo bi bofoka. <sup>28</sup>Akaokalisomi aikalanga lo'oto, kola ongoma ise inde akatomowa la akasombolela ye. <sup>29</sup>Ye aleko akainoisa bonoko mbo: Enyelaka mbo lo'okelelo we miaka likama ani, nla loikafeka bonoko wao ango lisiyo. Ongoma oikafei ango wana a bokoko ango mbile emoi lokambo lo'omale la baito lange, <sup>30</sup>kola ongoma eke akaya wana ao, ono akaosilisa bibongo la bataali ba belefe, osi'itela ye wana a bokoko bo baina. <sup>31</sup>Ye aleko akabeka li nde mbo: Wana, owe ombe lange eseke lomoi mbile itotina, la ongoma bibongo biangebitotina bimbe biao. <sup>32</sup>Kani ekaengana mbo to'omale la tongale la liomali lokambo nduku ao ono akambaka bolioy la ongoma akombe la liwawi lisiya, ambe bobinoi la asioshamana.

## 16

<sup>1</sup>Yesu akabeka aleko la baeki mbo: Buto amoi a bakute likama la boemali bo likuwa, boemali wamo akositokomo ambe ye mbo atoseisa bibongo bindebule. <sup>2</sup>Akata ye lioi, akabeka linde mbo: Ini mbeko loto'oka loka lo litina liao? Yo'oko oyaesa mboli ii likuwa liao, loka mbo oiyengani ale omba boemaeli bo likuwa. <sup>3</sup>Boemaeli bo likuwa akabeka ta liwawi linde mbo: Lo'okela ingi? Lokambo ngene ange atofoyei ta likuwa lieyeke limbei boemaeli loiti la bofoka bo lubusho nyele, la lombe la bowa bo loanganyo. <sup>4</sup>Loluwi yeke itokelei, mbo kamba loka lo lofoyomo ta likuwa liange, baomale alnge aiteni ii mbele ibo aleko. <sup>5</sup>Akata bo beke bakambaka la belima beya ngene ibo, amoi la amoi, ongoma akabeka la ono a felo mbo, ombe la bolima boya ngene ange yange? <sup>6</sup>Akabeka mbo: Bandjandja mia ba baina, akabeka linde mbo: Osaka lokasa lao. Tiamisaka ye ifelo la andikaka kani tuku liondo. <sup>7</sup>La liko akabeka la asiya mbo: Owe aleko ombe la bolima bo yanga? Akabeka mbo: Iotunga mia emoi ee bakoke. Akabeka linde mbo: Osaka lokasa lao la sonaka tuku bonanei. <sup>8</sup>Ngene a bokuwi bo likuwa wamo bobo akaila ye likolo loka mbo aokela bolo. Bainenge ba basiyo bee basieta bainenge ba lowa la bieli aiteni ii befindi bibo aleko. <sup>9</sup>Ei aleko lo'obeka lino mbo: Osakai baito lino loka lino ta mboli ibe mbe lamba ikaosila, batukumaele enu aiteni ii bengaenelo be momongo. <sup>10</sup>Ono ambe la momongo ta lobeko loeti lokikelike ambe aleko lala momongo ta lobeko loeti la lokikelike la aiti aleko ta lobeko lofi. <sup>11</sup>Kola ongoma yomba oiti la momongo ta mbeko ii bakute babe, ndai atoesa bakute ba'omongo ta baoo bino? <sup>12</sup>Yomba mbo oiti la omongo ta bieka bi buto asiya, ndai atofe'nu yeke imbe loka lino? <sup>13</sup>Bokuwi aiyengani olitisa bangene baele; loka mbo otioyana la amoi la ye kola ongoma onomoi, ao koto'amana la amoi la atoseola onomoi. Oengani ndjo olitisa Mungu tinga bakute. <sup>14</sup>Bafalisai beke basamaka bakute eokaka bo ye mbeko, la bakaseka Yesu. <sup>15</sup>Akabeka libo mbo: Enu otolongisomoi ta baiso ba baito, ndjo Mungu alembeli betema bino; loka yamo imbe bofi ta baito, ndjo imbe la lilo ta baiso baya Mungu. <sup>16</sup>Bikela bi banangoli bimbaka kota mbile eya Yoani, ndjo mbisa ii yamo Mboli Itanu ii Bokota Mungu itonangolomo la baito batotina bafotisa yo la bofoka. <sup>17</sup>Lokpose lo likoi limoi li ekela ifoeta lolimowo lo lobola la nyele la bofoka. <sup>18</sup>Botolome la botolome ono akafoya boali inde ekosonga botaali asiya, atokela bosambo; la botolome ono atosonga botaali ono akafoyomo ta botolo asiya, atokela bosambo. <sup>19</sup>Buto amoi ambaka lifoka, la abataka tulu enenu elo, la aomalaka lisiyo la lisiyo la lieti lilo. <sup>20</sup>La ibube imoi, lina linde mbo Lasalo, alalisomoko ta boinda winde, bindo binde bimbaka la bafwa. <sup>21</sup>Ambaka la yeme iyosilisa ango semba inde ta mbumbusi yeke imbaka itokpase ta mesa eya lifoka; ndjo ngea imbaka itolauna bafwa binde. <sup>22</sup>Ibube akangba la akatolomo la bakitomo ta bokuku boya Abalayama. Buto a lifoka aleko akangba, la akaseliomo. <sup>23</sup>Ambaka ta bomusi ta eseke lo bangbei, akaila baiso binde la akaena Abalayama esika, la Lasalo ta bokuku winde. <sup>24</sup>Ye akata mbo: Afa Abalayama! Okelekei ngandi! Tomaka Lasalo ate yombo ii inekele inde ta baye la aunde ango lolame lange loka ta bomusi likama ta imbé ye. <sup>25</sup>Ndjo Abalayama akabeka linde mbo: Wana, enyelaka mbo o'oshaka mbeko yao ilo ta liwawi liao, kola ongoma aleko Lasalo aoshaka mbeko ibe; ndjo kanikani aofomo bofoka la owe ofo'oka bomusi. <sup>26</sup>Lisiya aleko mbo katikati ii liso lino likemba lifi limbe, ndjo beke bambe la yeme iyofoka eke loka elo embe'nu, baitoengana, baiyengani aleko olekisa fangi ene embesu. <sup>27</sup>Akabeka mbo: Kola ongoma, Afa, lo'olengila lao mbo otome ango ye elo ta mbele eya Ise ange, <sup>28</sup>loka lombe la banduku batolome liondo, loka baiyaka eke ta eseke lo bomosi. <sup>29</sup>Abalayama akabeka mbo: Bambe la kasa iya Mose la banangoli, tikaka mbo baoko bo. <sup>30</sup>Ndjo akabeka mbo: Tinga alo, Afa Abalayama, yomba mbo buto amoi atofowa ta bangbei loko elo embe bo, batokikolia betema. <sup>31</sup>Ndjo akabeka linde mbo: Yomba mbo baiyoki Mose, la banangoli, baimboimila aleko imbe ende mbo buto amoi ta bangbei atoyayowa.

## 17

<sup>1</sup>Akabeka la baeki binde mbo, Bakulia baitoeno, ndjo ndjo ngandi la ono atoesa yo; <sup>2</sup>yomba mbo atoumisa amoi ta beke bake likulia, iyengani linde mbo litali lifi likandomoko ta ngingo inde la akusomoko ta libande lifi. <sup>3</sup>Kebakai lino! yomba kembo nduku ao aokela bobbe, mamilaka ye. Yomba mbo atokikolia botema, mesilaka ye. <sup>4</sup>Imbe ende mboakelelo we bobbe mala bosambale ta lisiyo limoi, la ekoya ambowe mala bosambaele obeka mbo, lokosa; mesilekei, oengani omesila ye. <sup>5</sup>Batomomu bakabeka la Ngene mbo, talielekesu limeli. <sup>6</sup>Ngene akabeka libo mbo, yomba kembo otombai la limeli kee yuma i botshitsha, ani oengani obeka la isandu yeke mbo, yolomoko la lobomoko ta baye, la itolitiseni. <sup>7</sup>Yomba kembo amoi inoambe la bokowa ono atobusha nyele lamba atokuka bokoko, la bokowa atofoa ta elanga oota t mbele, atobeka linde mbo, Yooko mangu ongala ta mesa? <sup>8</sup>Ndjo aitobeka linde ani mbo; Komanyaka bieka biange biola, bataka tulu, la fekei bieka tii kani etosilei ola la lomwo; lambisa otoola la otomwa aleko. <sup>9</sup>Atofa bokowa kekelele loka aokela likuwa lieke libekakaye? <sup>10</sup>Kolaongoma enu aleko, yomba mbo osilai okela mbeko itotina yeke ika bekelomo enu, bekaka mbo, toiti bekowa belo, tosila okela lotomo liso. <sup>11</sup>Oko embaka Yesu atoka ta Yelusalem, akaeta katikati i Samalia la Galilai. <sup>12</sup>Ekambaka ye atoota ta boki bomoi, batolome liou ba baandi bakatoamna linde. Bakaemala esika. <sup>13</sup>Bababeka mbo, Yesu! Ngene! Okelekesu ngandi. <sup>14</sup>Akamoi la bo la akabeka libo mbo, kakai okaenisa bakanga bindo bino. Ekaka bo, bakatanisomo. <sup>15</sup>Amoibo ekaenaka yeafouwa, akabinowa la akasimolla Mungu la limiki lifi. <sup>16</sup>Akasulua ta bombo winde ta bakolo baya Yesu la akafa ye kekelele. Yeambaka Mosamalia. <sup>17</sup>Yesu akabeka mbo, baito liou baitanisomu? Libwa bambe endei? <sup>18</sup>Buto asiya aibinoi oyafa Mungu kekelele, sakolo ko we boenda? <sup>19</sup>Akabeka linde mbo, emalaka, la kaaka eyao. Limeli liao liosila ouwiso we. <sup>20</sup>Bafalisai bakaiyola ye lamba Bokota boya Mungu botoya ta ani mbile, la akabinoisela bo mbo, Bokota boya Mungu boitoya ta bofono weke otomolai. <sup>21</sup>Baimbo beka mbo, tene owe! lamba mbo, Tene oye elo! Lokambo Bokota boya Mungu bombe katikati ino. <sup>22</sup>Akabeka la baeki binde mbo, basiyo batoya eko etombenu la yeme iyena lisiyo limoi ta basiyo ba Wana a buto, ndjo oitoenai yo. <sup>23</sup>Batobeka lino mbo, Tene ye ete! Tene ye ono! Ndo tutai bo. <sup>24</sup>Loka kee ani etobana ikalikali, itobana ta fangi e likolo kota fangi esiya, etomba lisiyo li Wana a buto ongoma. <sup>25</sup>Ndjo iyengani koni linde felo oena wale ta mbeko likama, la ofekomo ta we bofindi. <sup>26</sup>Kanda emoi ta basiyo baya Noa, itomba ongoma ta basiyo baya Wana a buto. <sup>27</sup>Bambaka batola, batomwa, bakasonga, baka songamana, tii kota lisiyo liotaka Noa ta lisuwa, la fela ekaya oyaita boatotina. <sup>28</sup>Lisiya kanda emoi ta basiyo baya Lota, balaka, bakamwa, bakasomba, bakaungisa, bakaloba, bakashwa, <sup>29</sup>ndjo ta lisiyo lifoaka Loti ta Sodomu, litundulundu li imbe li likolo likayase la ikaita bo batotina. <sup>30</sup>Itomba kee ye mbeko ta lisiyo litoenena Wana a buto. <sup>31</sup>Ta lisiyo liamo, ono atomba ta bosambu bo mbele, la biengo binde ta mbele, aitosulua oosa yo; kolaongoma ono ambe ta bilanga aimbo bino ale. <sup>32</sup>Enyelaka boali aya Lota. <sup>33</sup>Yomba mbo oni buto atota botema winde okuka liwawi linde, atoseisa yo; ndjo ono atoseisa liyo, ye ndjo atokuka. <sup>34</sup>Lobeka lino mbo ta lotiyo lamo baito baele batomba ta litamba limoi, amoi atosomo la asiya ato tikala. <sup>35</sup>Baito baele batomba ta bilanga, amoi atosomo la asiya atotikala. <sup>37</sup>Bakabinoisela ye mbo, Ngene ambe Endei? Ye akabeka libo mbo, eseke lombe bolioyo, oko ndjo etotoamana ndjou.

## 18

<sup>1</sup>Akabeka libo bombila bomoi talitina mbo iyengani libo osembela mbile etotina la ndoena kolewa. <sup>2</sup>Akabeka mbo bosambisi ambe ta boki bomoi, ono aitibanga Mungu la aitiyenela buto angoamoi. <sup>3</sup>Ndjo ta boki wamo botaali amoi ono angbeloko olome ambaka, akaya ambe ye la akabka mbo, longisekei ta litina li boiyani wange. Felo, akafeka, ndjo ta botema winde akabeka mbo, imbe ende lobangi Mungu, la loiyenyelisi buto, <sup>5</sup>ndjo loka kembo ono botaali aotungisei, loto longisa ye loka kembo ailewisekei oya eke kila lisiyo. <sup>6</sup>Ngene akabekambo, okaka yeke ikabeka bosambisi bobbe. <sup>7</sup>Mungu aitolongisa batshakolomu binde, beke batota ye lotiyo kee lowa, beke atooka bo la botema bosa? <sup>8</sup>Lobeka lino mbo atolongisa bo la mangu. Ndjo eko etoya Wana abuto, atoanya limeli eke ta wenda? <sup>9</sup>Akabeka bombila we ta basiya beke bataka betemata mbeko ibo mbo bambe baito balo, la baseolaka baito basiya. <sup>10</sup>Baiti baele bakalila ta Tempelo loka losembola. Amoi Mofalisai asiya Bokongoli bo mpako. <sup>11</sup>Mofalisai akasembola mbo, Mungu, losimolo we loka loiti kee baito basiya, biba, baito babatshunelo, baito ba bolefe, la loiti aleko kee bokongoli ono a mpako. <sup>12</sup>Loto kila bieka mala yeke kila posho, la lotofa botoku bo liou ta biengo bitotina yeke lotoanya. <sup>13</sup>Ndjo bokongoli bo mpako akaemala esika, aikalanga ango oila baiso la likolo, ndjo akauma bokuku winde la akabeka mbo, Mungu, ngbelekei ngandi ei buto a bobbe. <sup>14</sup>Lobeka lino mbo, ta bo abaele, ono kasuluaka ta mbele inde bokaolongisoko, loka mbo ono atoanya lokuku, lokuku linde lotofoa; ndjo ono atofeka lokuku, lokuku linde lotoma lofi. <sup>15</sup>Baito bakaya la bainenge ambe Yesu mbo aunde bo, ndjo ekaenaka baeki ongoma, bakamamila bo. <sup>16</sup>Yesu akata bo ambe ye la akabeka libo mbo, Tikaka bainenge baye ambei, ndo fekilai bo, loka mbo Bokota boya Mungu bombe loka lo baito ba bomuna we. <sup>17</sup>Lobeka lino wewe mbo, yomba mbo onu buto aito tukumela Bokota boya Mungu kee wainenge, aitota elo. <sup>18</sup>Buto bokonde amoi akaiyola ye mbo, Boekesi Bolo, lokele isai loka loanye liwawi li layalaya? <sup>19</sup>Yesu akabeka linde mbo, loka longi otetei Bolo? Buto bolo aiti, sakolo ko Mungu ango. <sup>20</sup>Olembeli bikela, oiwaka bolefe, oitaka buto, oibaka, ndo beka mbeko i lolanga, litisaka ise ao la inango ao. <sup>21</sup>Ye akabeka mbo, lolitisi mbeko kani lokmbe wainenge. <sup>22</sup>Ekaokaka Yesu ongoma, akabeka linde mbo, leka lomoi lokombe ambowe. Ungusaka bieka bitotina bimbe lao, la anaka yo ta tubete, la otomba la bieka likama bi lokuku ta lobola; la yoko oya tutei. <sup>23</sup>Ekaokaka ye mbeko ye, akamba la ngandi fafo, loka ambaka lifoka li biengo likama. <sup>24</sup>Yesu, akaena boyaeli winde, akabeka: imbe la tale mbo buto a lifoka aote ta bokota boya Mungu! <sup>25</sup>Yeiti la tale la nama ekumo kamela oota ta lifola li sindani kee butoa lifoka oota ta bokota boya Mungu. <sup>26</sup>Baito be bakaoka baka beka mbo: ndai aengani ouwisomo? <sup>27</sup>Yesu akamutola, le lombe la tale ambe baito, ambe Mungu loiti la tale. <sup>28</sup>Petelo akabeka, tene, esu totika itotina la tootuto we. <sup>29</sup>Kolaongoma Yesu akabekela ye: lobeso we ta wewe, buto'no akatika mbele, lamba boali, lamba banduku binde,

lamba ise la inango inde, lamba bana binde, loka lo bokota boya Mungu,<sup>30</sup> Atoosha likama ta miaka bieke, la miaka bieke bitoya liwawi li layalaya.<sup>31</sup> Yesu akaosa baeki liou la baele eseke lomoi linde, akabekela bo: Tene, totoka ta Yelusaleme, la itotina ye ikasonomo la Batondoli loka lo wana abuto itoenganisomo.<sup>32</sup> Atokusomo ta bapakano; atosekomo, atoutomo soi, atomolomo,<sup>33</sup> la, mbisa ionga, atoumomo fimbo, batoita ye; la lisiyo li' asaso atofufuka.<sup>34</sup> La baitoluwa litina li mbeko yamo; imbaka loka libo lioi limoi li boise, baoi be baitiluwa litina.<sup>35</sup> Ekomaka Yesu tina la Yeliko, bongbei bo baiso amoi angalise mbalé e ndole, la'tolengikila bieka.<sup>36</sup> 'Eokaka ye iyeli' baito batoeta, akaiyola imbe ingi ikaya.<sup>37</sup> Bakabeisa ye mbo: Imbe Yesu a Nasaleta atoeta.<sup>38</sup> La' kamama mbo: Yesu, wana' ya Dawidi, okelek'ei ngandi!  
<sup>40</sup>Yesu, akasikama, akabekela bo baye linde; la, mbile ekomaka ye,<sup>41</sup> akaiyola ye mbo: Osami lowelo ingi? Akabinoisela ye: Ngene, loene lisiya.<sup>42</sup> Kolaongoma, Yesu akabekela ye: Enaka lisiya; limeli liao lisuwiso we.<sup>43</sup> Mala emoi akaena lisiya la'katuta Yesu, lani atofa Mungu lokuku. Baito batotina, be baenaka ongoma, bakasimola Mungu.

## 19

<sup>1</sup>Yesu akaota ta Yeliko la akambaka atoeta katikati ee boki.<sup>2</sup> Botolome amoi, lina linde Zakai, akambaka onga; ye bokota bo beke batokongokolaka pako, la akambaka lifoka.<sup>3</sup> Akaluka ndole eona Yesu lamba ambe ndai, loka lo linginda li baito, aikapata fofe loka ye ambaka bouwe.<sup>4</sup> Akaaka mangu felo la akalila ta isandu loka aene ye loka akambaka mboko la yeme iyo etela ta ndole amo.<sup>5</sup> Yesu akakoma ta eseke lamo, akamoila likoló, la akabeka linde mbo: Zakai! suluaka mangu, loka iyengani lange ongala ta mbele ao laboni.<sup>6</sup> Akasulua mangu la akakuamelae la liomali.<sup>7</sup> Baito batotina beke baenaka ongoma, la baka beka beka mbo, aoka okangala ta mbele ee buto a bobé.<sup>8</sup> Zakai akaemala la akabeka la Ngene mbo, okaaka Ngene, lotofa la tobube lioshi liange owana mala yele. Yomba mbo lkawaka bobé ta leka lo buto, loto binoiselae mala inati.<sup>9</sup> Yesu akabeka linde mbo: laboni louwo loya ta mbele ene, loka mbo ye aleko ambe wana aya Abalayama.<sup>10</sup> Loka wana a buto aye oya luka la ouwisa beke bakaosila osesela.<sup>11</sup> Ekambaka bo ba tooka ye ndjaso, Yesu akaata bombila bosia loka akambaka tina tina la Yelusaleme la bakambaka la bowa kembo Bokota boya Mungu botoenena kani kani.<sup>12</sup> Kolaongoma akabeka libo mbo, buto amoi a lokuku akaaka lokendo ta boki bo esika loka loosa bokota la lobinowo.<sup>13</sup> Akaata bekowa binde liou, la akafa bo touma to palata liou. akabeka libo mbo: wakai liala tii kani loto binowa.<sup>14</sup> Ndjo baito binde ba boki, bakaokae wale, la bakatoma baito mbisa inde, obeka mbo, toilingi buto ono ambe bokota wisu.  
<sup>15</sup>Mbile bokota akabinowa, mbisa iosha bokota, akabeka mbo bekowa biamo beke bafomoko bieto baotomo ambe ye loka aluwe lamba buto la buto apate yanga ta liala linde.<sup>16</sup> Ono a felo felo akaya la akabeka mbo: Ngene, palata yao mia lofosha palata isiya mia.<sup>17</sup> Akabeka linde mbo: Bolo! owe ombe bokowa bolo. mbaka la bokota bo bieki liou, loka okambaka la wéwé ta mbeko ikikelike.<sup>18</sup> A baele akaya la akabeka mbo, Ngene, palata yao mia, lofosha palata isiya liondo.<sup>19</sup> Akabeka linde aleko mbo, mbaka bokota bo bieki liondo.<sup>20</sup> Ono moi akabeka mbo, Ngene, ine palata yao mia oye lokakukaka yo ta itambala,<sup>21</sup> loka lokambaka lotobangowe, loka ombé buto a bofoka.otoosa yeke oikaisa, la otobuna oko oilobi.<sup>22</sup> Akabeka libo mbo, lotokpesowe ta baoi bao angene. owe bokowa bobé! okaluaka mbo lombe buto a bofoka, lotoosa oko loiyisi, la lotobuna oko loika loba?<sup>23</sup> Loka loingi oikataka bieto biange ta beke batisaka bieto? Loka lokobinowa looshe yo la botalia?<sup>24</sup> Akabeka la beke bakaemalaka onga mbo, kpolakai ye touma to palata mia, lafakai yo ta ono ambe la palata liou.  
<sup>25</sup> Bakabeka linde mbo, Ngene, ambe la palata liou!<sup>26</sup> Akabeka libo mbo, batofa bieka bisiya ta ambe ono akapata, loka loya ono akakosa, batosela ye yeke ambe layo.<sup>27</sup> Loka lo baiyani bange beke bakalanga mbo lombe bokta wibo, yookoi libo eke embei la itakabo ta baiso bange.<sup>28</sup> Ekasilaka Yesu obeka ye mbeko, akakenda felo ooka ta Yelusaleme.<sup>29</sup> Akakoma tinatina la Betefage ta Betaniya, ta eseke lo- longo, yeke bakaata mbo, longo lo- Bilaya, la akatoma baeki binde baelé,<sup>30</sup> la akabeka mbo, kakai ta katikati ee boki eli etoimolana lino, la oko etootenu aiteni ee boki, otoshai wana a bokoko ono akandomu, buto aitaka lilelae. sombulakai ye la yokoi linde eke.<sup>31</sup> Yomba mbo buto akaofelonu mbo otosombulai amo loka loingi? Bekakai mbo, Ngene ambe la yeme lamo.<sup>32</sup> Beke bakatomomoko bakaka, bakaosha amo ototana ani ebekaka Ngene libo.<sup>33</sup> Oko ekambaka bo batosombula wana a bokoko, bangene binde bakaiyola bo mbo, loka loingi otosombulai wana a bokoko? <sup>34</sup>Baka beka mbo, Ngene ambe la yeme lamo.<sup>35</sup> Bakaya lamo ambe Yesu, la baka kusa tulu ii bo likoló li-wana a bokoko, la baka lilisa Yesu.<sup>36</sup> Mbile eka kendaaye, bakakendja tulu ii bo ta ndole.<sup>37</sup> Akakoma ta eseke le lombe loka losuluwa ta longo lo- Bilaya, la likama li baeki bakakola ofa Mungu lokuku la liomali la bamiki likama loka lo bakuwa baofoka ba limwali bieke bakaena,<sup>38</sup> bakabeka, Bokota ono atoya la lina liya Ngene aosheke lokuku! kimia ta bose, la talaa ta biseke bieti likolo!<sup>39</sup> Bamoi ta Bafalisai aiteni ii babule bakabeka linde mbo, Boekesi, mamilaka baeki bao!<sup>40</sup> Akabinoisela bonoko ye mbo, lotobeka lino mbo yomba mbo beke beke bakaongala hai, imbe batale batomama.<sup>41</sup> Ekambaka ye tna la boki, akamoila, la akalela loka lo- boki mbo, imba mbo ta <sup>42</sup>lisiyo lie okalukaka mbeko itoesa kimia; la kanikani bafoisama ta baiso bao.<sup>43</sup> Lka mbo ta basiyu batoya lao bayinani bao batokela likula lifi ta nyele, la bato lingilowe, la okandaka biseke bitotina;<sup>44</sup> batokusowe sekala la bana bao aiteni, la baitotika ango litale limoi liokó li- litale lisiya, loka mbo oikaluaka lisiyo litoya la Mungu ambowe.<sup>45</sup> Akaota ta Tepelo la akaakola otomoisa baungisi.<sup>46</sup> Akabeka libo mbo, isonomu mbo: Mbele ange etomba mbele ee basomboli, limo enu oselai amo eseke lo biba.<sup>47</sup> Akambaka aiteni ee Tepelo basiyu batotina atoekisa, biange bifi, la bandiki, la biange be baito, bakambaka owa mbo bati ye.<sup>48</sup> La baikana fofe lamba batokela isai, loka baito batotina bakambaka batooka ye la yeme likama.

## 20

<sup>1</sup>Lisiyo limoi Yesu ambaka ta Tepelo atoekisa baito la lonangolo Mboli Itanu. Bakanbga bafi la Baandiki, la Baoolo ba boki, bakakoma ambe ye,<sup>2</sup> La bakabeka linde mbo, beisekesu lamba otonangola mbeko ye ta boni bofoka, la, ba ndai akafowe

bofoka wamo.<sup>3</sup>Akabinoisela bo bonokombo, Ei aleko lotofelenu lobeko lomoi, bekelekeni, <sup>4</sup>Lilufi liya Yoani lifoywe la likolo lamba ta baito?<sup>5</sup>Bakabekamana bo angene mbo, yomba mbo tokaobeka mbo la likolo, ye kobeka liso mbo, loka loingi oikkaimilai ye? <sup>6</sup>Yomba mbo tokaobeka mbo ta baito, baito batotina bo kobolesu babuki, loka baodila oimila mbo Yoani ambaka Bonangoli. <sup>7</sup>Bakabinoisa bonoko mbo, toiluwi lamba ifowe endei. <sup>8</sup>Yesu akabeka libo mbo, ei aleko loitobeisenu lamba lotokela mbeko ye la boni bokota. <sup>9</sup>Yesu akakola obeka bombila we ta baito mbo, buto amoi alobaka Elanga lo miwiti la akafa yo ta bao ba Bakuwi, akaka lokendo loosa. <sup>10</sup>Tambile e touma akatoma Bokwa ambe ba Elanga bafe ye iniyo itouma to elanga. Ndjo bakuwi bakakutcha ye la bakabinoisa ye bao bule. <sup>11</sup>Akatoma bokowa bosiya, bakauma aleko ye, bakamola ye, la bakabioisa ye bule. <sup>12</sup>Lambisa akatoma bokowa bo asaso, bakaita ye bafuwa, la bakakusa ye lousa. <sup>13</sup>Ngene a elanga akabeka mbo, lokele ase ingi? Lototoma wanange bosamomu, lamba batolitisa ye. <sup>14</sup>Ndjo bakuwi bakaena ye, bakabekamana mbo, ono ambe ngene bondanda, toitekei ye loka bondanda bombe wisu. <sup>15</sup>Bakakusa ye lousa lo Elanga, la bakaita ye. Ndjo Ngene a elanga lamo atokela bo ingi? <sup>16</sup>Atoya la atoita bekowa biamo, la atofa elanga ta bao babuto asiya. Ekaokaka bo ongoma, bakabeka mbo, tinga ongoma! <sup>17</sup>Akamoi la bo, la akabeka mbo, yeke ikaosila osonomo imbe la lini litina? Litale likafekomo la be batoshwa, yosila omba buto a liko. <sup>18</sup>Ono atokpela ltale liamo atobuneya, yomba mbo itokpela oni buto, yokomiaka ye kee bouta. <sup>19</sup>Baandiki la Bakanga bafi bakalinga mbo bate ye bao ta mbile amo, ndjo bakabanga linginda; loka baluakambo abeke bombila wamo loka libo. <sup>20</sup>Bakamoi la ye, la bakatoma Totombi beke balimbaka mbo bambe baito baito ba wewe, loka baunde lioi ta bonoko winde, loka bakese ye la bofoka ta bokota bo ngene awenda. <sup>21</sup>Bakaiyola ye mbo, Boekesi, toluwi mbo otobeka la otoekisa wewe, la oitoenyela lokuku lo buto, otonangola ndole eya Mungu wewe. <sup>22</sup>Iyengani liso olipa Kaisala lindjandja ao yeiyengani?<sup>23</sup>Aakalembela weli wibo, la akabeka libo, <sup>24</sup>Enisekeni denali. Imbe la bombo la bolendela boyandai? Bombo, boya Kaisala. <sup>25</sup>Ndjo ye akabeka libo mbo, lipaka Kaisala biengo biya Kaisala, la iya Mungu biengo biya Mungu. <sup>26</sup>Kolaongoma baikaengana okanda bonoko winde ta baiso ba baito, ndjo bakamwala la limutoli linde, la bakangala hai. <sup>27</sup>Bamoi ta Basdukai bakaya, ani batobeka mbo, lifufukomu lieti, labakaiyola ye mbo, <sup>28</sup>Boekesi, Mose asonelesu mbo, yomba mbo nduku ao botolome akaongba, ono ambaka la boali, ndjo aiboti wana, ndjo nduku inde atosa boali amo loka abotele nduku inde bofindi. <sup>29</sup>Kolaongoma bambaka banduku bosambaele, ono afelo akasonga botaali, akanbga ndoena wana; <sup>30</sup>Ono a baele, la <sup>31</sup>Ono a basaso bakasonga ye, koongoma ta bo bosambale, baitiki bana, la bakangba. <sup>32</sup>Lambisa botaali aleko akangba. <sup>33</sup>Ndjo ta lisiyo li - lifufukomu, botaali amo atomba boali aya ndai ta ambe bo? Loka akambaka boali ibo bosambale. <sup>34</sup>Yesu akabeka libo mbo, bana baene fetcho batosonga la batosongisana, <sup>35</sup>Ndjo beke baengani okoma ta mbile amo la ta lifufujomu li bangbei batosonga, la baitosongolomo, <sup>36</sup>Lpka baimbo ngbale, bafosengana la Bakitomo; bambe bana ba lifufukomu, la bambe aleko bana baya Mungu. <sup>37</sup>Ndjo banbgei batofufuka, la Mose aenise aleko ongoma ta botuku bo isandu, elo etaka ye Ngene, Mungu aya Abalayama la Mungu a Yisaka la Mungu aya Yakobo. <sup>38</sup>Aiti Mungu a bangbei, ndjo, a baito ba liwawi, loka linde baito batotina bambe la liwawi. <sup>39</sup>Bamoi ta Baandiki bakabinoisa bonoko mbo, Boekesi, obeka boolo. <sup>40</sup>Loka baitimbale la kanda, eofela ye lobeko ango lomoi. <sup>41</sup>Akabeka libo mbo, batobeka isani mbo Kilisito ambe wana aDawidi? <sup>42</sup>Loka Dawidi yeangene abeke ta loksa lo Boele mbo, Ngene aobeka la ngene ange mbo, ngalakase ta boo bolome wange. <sup>43</sup>Tikani etotei baiyani bao kee etelo lo bakolo bao. <sup>44</sup>Kolaongoma Dawidi ateye mbo, Ngene, ekomba aleko wana inde isani? <sup>45</sup>Oko embaka baito batotina batobeka, akabeka la Baeki linde mbo, <sup>46</sup>Kebakai la Baandiki, beke batokendakenda la tulu isaisa, balangi ofomo kalibo ta baongo, la ongalase ta biseke bi lokuku katikati ii Bisongamelo la tchwenga; <sup>47</sup>La batoola bieka bi baatali be bakaonbgelo balome la basomboli basasa loka lo limbaka. Beke bambo sambisomoko tale.

## 21

<sup>1</sup>Yesu akaila baiso binde likolo la akaena bafoka batota bafaefi bibo ta lisele. <sup>2</sup>Akaena aleko botaali amoi ono angbeloko bolome ono ataka ango bakute baele. <sup>3</sup>La akabeka: Lotobeka lino, ta wewe mbo, ono botaali ibube aota koeta baito atotina; <sup>4</sup>loka baese yeke ikambaka libo ibube ta lisele, ndjo ye ate yeke akambaka layo ii litina, itotina inde yeke ambaka lamo loka lo'louwelo. <sup>5</sup>Ani bamoi babekaka loka lo esondjamelo, la yeke imbaka la tongeli-ngembe ta batale balo biongo bitolomoko loka lo bafaefi, Yesu akabeka mbo: <sup>6</sup>Ta basiyu batoya, ta yeke otoenai, yeitotikala ango litale likolo li litale lieke lieitofoyomo. <sup>7</sup>Bakafela ye mbo: Boekesi, eni mbile itokoma, la ingi itomba ndembe iyo mbeko? <sup>8</sup>Yesu akabinoisa mbo: Moilakai kembo oiseselakai. Loka likama batoya la lina liange la batobeka mbo: Imbei, la mbile eomba tina. Oitutakai bo. <sup>9</sup>Ta mbile oto'okai elundi lo bitumba la bayeye, oimbakai la bowa, loka yoko itoya koni felo. La yeitakamba liko. <sup>10</sup>La akabeka libo mbo: "Yese imoi itoemaela yese isiya, la bokota botoemaela bokota bosiya". <sup>11</sup>Itomba la lobilimo lofi lo wenda, la biseke likama, la semba la tofalala totoenena, mbeko ii tale itokelomo la ndembe ii tale itoenena ta lobola. <sup>12</sup>La felo ii itotina, batounde'nu, la bato'okise'nu wale. batokese'nu ta bisondjamelo, batokuse'nu ta bonyololo, batoka lino felo ii bekota, la felo ii bekota befi, loka lo lina liange. <sup>13</sup>Yoko itofe'nu ndole ee libekelomu. <sup>14</sup>La mbakai la limeli kembo oitibekai enu'angene, <sup>15</sup>loka lombofeke'nu bonoko bosiya la liwawi loka kembo baiyani bino batotina baimbo'engana oemaale'nu. <sup>16</sup>Otokesomoi ango la baise bino, banduku, kendisani la bangani, la baitoita likama ambe'nu. <sup>17</sup>Otoiyanai la batotina, loka lo lina liange. <sup>18</sup>La oitobungisai ango losowe lomoi lo bochwino; <sup>19</sup>ta ndole ee bofilili wino otuwisai belimo bino. <sup>20</sup>Ta mbile otoenai lingida li basola ta Yelusaleme, luwakai mbo liseisomu line liomba tina. <sup>21</sup>Tikaka bangali ba Yudeya bakimbiye ta fongo. Beke batomba ta Yelusaleme batomowe mangu; beke batomba ta bilanga baitobinowa ta boki bofi. <sup>22</sup>Basiyo bo, batomba basiyu ba likuchi ta itotina yeke ikabeka tosiyo itoenganisomo. <sup>23</sup>Ngandi, ta basiyu bamo, la bataali ba baeme la beke batomwesa bana! Loka itomba la ngandi ta boki, la lisomi loka lo baito. <sup>24</sup>Batopkase la lowelo lo

kembe, batomba bakandomu ta yese itotina, la Yelusaleme itomatekelomo ta bakolo ba yese, tiii kani mbile ee yese etoengana.<sup>25</sup>Itomba la ndembe ta lowa, ta bondofa la tolonge. La ta nyele, itomba la bowa ta befindi baimbo luwa ango batowa isai, ta iyeli ii libande.<sup>26</sup>Baito likama batongba loka lo bemusi bieke bitomba wenda bototina, loka bofoka bo likolo botokpase.<sup>27</sup>La totena Wana a Buto atoya ta bose la bofoka la talaa efi.<sup>28</sup>Mbile etokoma yo mbeko, ilaka bochwe la mbakai la bofoka; loka lolikolomo lino lo'omba tina.<sup>29</sup>Akabeka libo we bombila: Tene isandu ii loduke la tosandu tosiya.<sup>30</sup>Ta mbile etotomowa ngoto, otoluwai enu'angene, la loeno mbo mbile ee mbula efoakola.<sup>31</sup>Kolaongoma, mbile etokoma ye mbeko, luwakai mbo bokota boya Mungu boomba tina.<sup>32</sup>Lotobeise'nu ta wewe mbo, fetcho ene eitosila ango, ani yeke mbeko yeitaka koma.<sup>33</sup>Lobola la nyele itoeta baai bange baimboeta ango.<sup>34</sup>Kebakai enu angene loka betema bino beimbaka la bolito loka loetisela lili la limwi, la baenyeli ba liwawi, loka lisiyo liamo lieimbaka futuku; <sup>35</sup>loka itoya kee wengo ta bangali batotina ta bombo bo wenda.<sup>36</sup>Moilakai la sembolakai mbile etotina, loka o'oshei bofowi ta yo mbeko imbokomaka, la loemalo felo iya Wana a Buto.<sup>37</sup>Ta lisiyo, Yesu akaekisa aiteni ee mbele eya Mungu, la akaka okakpa ilo ta longo lokatomo mbo Longo lo Bilaya.<sup>38</sup>La baito batotina, nongo-nongo, batoka elo embe ye ta esodjamelolo loka lo'oka ye.

## 22

<sup>1</sup>Elambo lo bokati boiti la bote, ikatomo mbo Elambo lo lieti, lokamba tina. <sup>2</sup>Kanga ifi iya Mungu la basoni bakalinga kanda mbo baite Yesu; la'anibakambaka la bowa loka lo baito.<sup>3</sup>Kumbi Satana akaota ambe Yuda ono atomoko mbo Mokeliota, ambaka amoi ta liou la baele. <sup>4</sup>Yuda akaokoma la kanga efi la bokota bee bachungi, ta baenyeli baoita ye. <sup>5</sup>Bakambaka ta liomali la bakaokana mbo bafe ye falanga. <sup>6</sup>Akaimila, la akalinga kanda emoi mbo a'anele bo Yesu ta linginda li baito.<sup>7</sup>Lisiyo li bokati boiti la bote, oko imbaka mbo baite bokoko loka lo Elambo lo lieti, likakoma, <sup>8</sup>la Yesu akatoma Petelo la Yoani, akabeka mbo: Kakai okakomanyele'su bieka bi Elambo lo lieti, loka mbo tole. <sup>9</sup>Bakabeka linde: Olangi mbo tokomiye bio endei?<sup>10</sup>Akabinoisela bo mbo: Tene, ta mbile oto'otai ta boki bofi, oto'oshai buto amoi atoli baye ta bonyongo; tutakai ye ta ene mbele ato'ota, <sup>11</sup>la enu kobekai la ngene a mbele mbo: Ngene aobeka lao mbo: Loni eseke lombolaka Elambo lo lieti la baeki bange?<sup>12</sup>La atoenise'nu mbele efi ee likolo, elo ndjo etokomiye'nu Elambo lo lieti. <sup>13</sup>BAkaka, la bakaosha mbeko ani abekelaka bo; la bakakomanya Elambo lo lieti.<sup>14</sup>Ta mbile ekaya, bakangala ta mesa, la batomomu linde eseke lomoi. <sup>15</sup>Akabeka libo mbo: Lombe la yeme iyola lee Elambo lo lieti lino, felo mbo loene bomusi; <sup>16</sup>loka, lotobeka lino, loimbola ale ango, kota kani itoenganisomo ta bokota boya Mungu.<sup>17</sup>La, akaosa kobo la akasembola licholomu, akabeka: Osakai ene kobo, anakai amo ambenu; <sup>18</sup>loka, lotobeka lino mbo, loimbomwa'ale kowakola laboni yuma iye vinyo, tiii kani etoya bokota boya Mungu.<sup>19</sup>La mbisa akaosa bokati; akasembola licholomu, akabuna la akafa libo, akabeka: Yeke imbe bindo biange, bikafomo loka lino; kelakai ani loka loenyelisei. <sup>20</sup>Akaosa aleko kobo, mbisa ilikolase, la akafa bo, akabeka mbo: Kobo ene imbe liokani li kanikani ta ngelo yange, yeke ikautomose loka lino.<sup>21</sup>Enaka, boo boya ono atoungisei bombe lange eseke lomoi ta ene mesa. <sup>22</sup>Wana a Buto atoka ani embe ongoma. Ndjo ngandi la buto ono atokesa ye. <sup>23</sup>La baka'akola ofelana bo'angene ndai atokela ongoma!<sup>24</sup>Ikamba aleko ambe baeki la fiye imoi: Ndai ambe bo aengani omba bofi? <sup>25</sup>Yesu akabeka libo mbo: Bekota be tchese batoinyamela bo, la beke batomba tolonge batomo baito halo.<sup>26</sup>Oiwakai kee bo. Ono ambe bofi ambe'nu ambe kee ono bokikelike, la ono atokendisa ambe kee ono atokuwa. <sup>27</sup>Ndai ambe bofi, ono ambe ta mesa, lamba ono atokuwa? Oiluwi kembo ono ambe ta mesa? La imbe ei, ani embei aiteni lombe kee ono atokuwa.<sup>28</sup>Enu, ombei beke bakamba la bofilili lange ta bemusi biange; <sup>29</sup>kolayamo lo'ota bokota loka lino, ani ekatika Ise ange, <sup>30</sup>loka mbo olei la omwei ta mesa ange ta bokota wange, la loka ongali aleko ta keka loka lo'osambisa befindi liou la biele bee Isalaele.<sup>31</sup>Ngene akabeka: Simona, Simona, Satana ambe la yeme lao, loka lokendisowe kee yuma ibakoke ta bonyongo. <sup>32</sup>Lotosombola loka lao, loka liimeli liao liei seisamaka; la owe, ta mbile otokikowa, owangemisa banduku bao.<sup>33</sup>Ngene, Petelo akabeka linde mbo: Lombe kani mbo loke lao ta bonyololo lamba ta lingba. <sup>34</sup>La Yesu akabeka mbo: Petelo, lotobeka lao, koko eitota loko-loko ko laboni ani oitaka'anganyei mala isaso mbo loiluwi ye.<sup>35</sup>Akabeka libo aleko mbo: Ani lotomeke'nu ndoena litanga, ndoena bilato, loni leka oenokoi? Toitieno leka, bakabinoisela ye. <sup>36</sup>La akabeka libo mbo: Kani kani, ono ambe la litanga, aoseke, ono ambe la etelo aoseke aleko, la ono aiti la bopanga, aungiseke tulu inde loka lo'osomba emoi.<sup>37</sup>Loka, lotobeka lino, iyenga mbo lioi liye likasonomo lienganisomo ambei mbo: Atomo ta baito bobo. La yeke imoili ei imbe oko mbo ikome. <sup>38</sup>Bakabeka: Ngene, Tene, bepanga biele. Akabeka libo mbo: Yoko ifoengana.<sup>39</sup>Mbisa iyotomowa, akaka, otutana la asili inde, ta Longo lo Bilaya, baeki binde bakatuta ye. <sup>40</sup>Ta mbile ekomaka ye ta eseke lamo, akabeka libo mbo: Sembolakai, loka oikpakaise ta lipimomu.<sup>41</sup>La akaseyamana libo ta esika lolisase liokusa, la, akasuluwa la baluwi, akasembola, <sup>42</sup>akabeka mbo: Afa, okaolanga loyelekei ene kobo! Tinga mbo lisangi liange likelomoko, kanga ndjo lisangi liao.<sup>43</sup>La bokitomo amoi akaenamana linde loka lofaye bofoka. <sup>44</sup>Mbile embaka ye ta bowa bofi, akasembola likama, la tokoka chwinde tokamba kee bambimbilika ba ngelo, tokakpase ta nyele.<sup>45</sup>Mbisa iyo-sembola, akaemala, la akaka ambe baeki, akaosha bo bambi ta ilo ii ngandi, <sup>46</sup>la akabeka libo mbo: Loka loingi ombei ta ilo? Emalakai la sembolakai, loka mbo oiyotakai ta lipimomu.<sup>47</sup>Mbile ebekaka ye lisiya, tene linginda likaya; la ono aomoko Yudasai, amoi ta liou la baele, akambaka felo ii linginda. Akaya tina la Yesu, loka lo'oloma ye likeka. <sup>48</sup>La Yesu akabeka linde mbo: Yudasai, ta ndole ee kalibo ndjo otoungisa Wana a Buto.<sup>49</sup>Beke bambaka linde, bakaena yeke ikomaka bakabeka: Ngene, tokpeteke bo bopanga? <sup>50</sup>La amoi ibo akakpeta bokowa bo kanga efi, la akatena ye litoi li boo bolome. <sup>51</sup>La Yesu, akabeka libo: Tikakai, oiwakai! La, akaunda litoi li buto amo, akauwisa ye.<sup>52</sup>Yesu akabeka la botolioso, la bekota be mbele ee Mungu, la bato'olo, beke bayaka oyaemaela ye mbo: O'oyai, kee ambe wiba, la bepanga, la tosandu. <sup>53</sup>Lokambaka basiyo batotina lino ta esondjamelolo, la oikatakai boo wino ambei. Ndjo eke mbile ino, la bofoka bo balima. <sup>54</sup>Mbisa iyounda Yesu, bakaka linde, la bakaotisa ye ta mbele ee bokumi bofi. Petelo atotuta la esika.

<sup>55</sup>Baka ba'anisa litundulundu li imbe aiteni ii loya, la bakangala se. Petelo akangala aleko eseke lomoi libo.<sup>56</sup>Bokuwi bomoi botaali, akaena ye angali se felo ii imbe, akamoila ye, la akabeka: Botolome ono akambaka aleko linde.<sup>57</sup>Aka'anganya ye, akabeka mbo: botaali, loi liwii ye.<sup>58</sup>Mbisa ionga, asiya, akaena ye, akabeka mbo: Ombe aleko ta bo baito. Petelo akabeka mbo: Botolome, loiti libo.<sup>59</sup>Ikawa mbile emoi mbisa, asiya akabeka, mbo: Ta omongo botolome ono akambaka aleko linde, loka ambe buto a Galilaya.<sup>60</sup>Petelo akamutoela mbo: Botolome, loiluwi anga ani otobeka. Kota mbile amo, ani ebekaka ye, koko ekata loko-koloko.<sup>61</sup>Ngene, akabinowa, akamoila Petelo. La Petelo akaenyellisa lioi lieke Ngene abekelaka ye: Felo ii koko ota lokoloko laboni, otowanganyei mala isaso.<sup>62</sup>Ekatomowaka ye, akalela likama fafo.<sup>63</sup>Baito beke baundaka Yesu bakaseola ye la bakauma ye.<sup>64</sup>Bakaufa ye bombo, la bakaiyola ye, bakabeka mbo: Nangolaka, ndai akaumo we.<sup>65</sup>Bakamola ye bimolo likama.<sup>66</sup>Ta mbile bose bokaandja, linginda li bekota be baito, bekota, bekota, befi, ba'andiki bakaoshamana eseke lomoi, la bakaaka la Yesu ta beimo bino befi.<sup>67</sup>Bakaiyola mbo: Yomba mbo ombe Kilisito, beiseke'su, Yesu akamutoela bo mbo: Lokaobeise'nu, oitoomilai;<sup>68</sup>la, lokafele'nu, oimbo binoisai.<sup>69</sup>Kanikani, Wana a Buto atongala se ta boo bolome bo'ofoka boya Mungu.<sup>70</sup>Batotina bakabeka linde mbo: Ombe Wana a Mungu? La akamutoela bo mbo: O'obekai, lombe ye.<sup>71</sup>Kola yamo bakabeka mbo: Tokombe ale la yeme ii libekolomu? Tof'o'oka ye atobeka la bonoko winde angene.

## 23

<sup>1</sup>Lakama litotina libo bakaemala la bakaka linde ambe Pilato.<sup>2</sup>Bakakola ositaka ye mbo, tofoanya buto ono atoselisa bofindi wiso, la ofekila baito mbo bailipaka lindandja liya Kaisala, la obeka mbo ambe Kilisito, bokota.<sup>3</sup>Pilato akaiyola ye mbo, Owe ombe bokota bo Bayuda? Akabinoisela ye bonoko mbo ongoma.<sup>4</sup>Pilato akabeka la Bakanga bafi la linginda li baito mbo, Loiyani lobeko ambe buto ono.<sup>5</sup>Bo bakabeka likama mbo, Atotombokisa baito oekisa ta Yuda etotina, koakola ta Galilaya tii ko eke.<sup>6</sup>Ekaokaka Pilato alo, akaiyola lamba Yesu ambe buto a Galilaya. Ekakokaka ye mbo afowe ta bokota boya Elode, akatoma ye ambe Elode, ono ambaka ta Yelusaleme tambile amo.<sup>7</sup>Ekanaka Elode Yesu, akomala likama, loka akambaka la yeme iyoena ye mbile esa, loka akaokaka mbeko ta litna linde, la akambaka la yeme iyoena ikesa imoi okelomo ta bao binde.<sup>8</sup>Akaiyola Yesu mbile esa, ndjo aikabinoisela lioi anga limoi.<sup>9</sup>Bakanga bafi la Baandiki bakaemala elo la bakasitaka ye likama.<sup>10</sup>Elode la Basikani binde bakasetcha ye la bakaseola ye la bakabatasa ye tulu elo, la bakabinoisela ye ambe Pilato.<sup>11</sup>Ta lisiyo liamo, Elode la Pilato bakangala eseke lomoi kee banduku, loka felo bambaka baiyani.<sup>12</sup>Pilato akatomanisa Bakanga bafi la Bangene ba baito,<sup>13</sup>La akabeka libo mbo, osila ofei buto ono kee botomboki bo baito, lalosambisa ye felo ino, loiyani lobeko anga lomoi ambeye ta lisitiki lino.<sup>14</sup>Elode aleko ongoma, loka aobinoisela ye eke ambesu lisiya. Ndoena lobeko anga lomoi lo lingba loitokelomo loka linde.<sup>15</sup>Kolaongoma lotouma anga ye bofili. la lototika ye.<sup>16</sup>Ikaenganaka linde otomoisa buto amoi loka libo ta mnbile e Elambo.<sup>17</sup>Bkamama likama kee buto amoi mbo, Itaka ye!<sup>18</sup>Ye Balaba ambaka ono akusomoko ta bonyololo loka lo lotomboko lotomoaka ta boki, la loito lo baito.<sup>19</sup>Pilato akkat - bo lisiya loka ambaka la yeme iyotomoisa Yesu,<sup>20</sup>Ndjo bakamama mbo, ta Lieka! Taliaka ye ta Lieka!<sup>21</sup>Ye akabeka libo mala eya saso mbo, Buto ono awe ase boni bobe? Loiyani lobeko anga lomoi loengani la lingba loka linde, ndjo lotouma ye bofili la lototomoisa ye.<sup>22</sup>Bakamaka la limiki likama obeka mbo, ataliomoko ta Lieka; la limami libo lietaka likama.<sup>23</sup>Kolaongoma Pilato akatena mbo baose yeke bakalengila.<sup>24</sup>Akatomoisa buto ono ambaka ta bonyololo loka lo litomboki, la loito lo baito, ono balengilaka; la akafa Yesu loka lo yeme ibo.<sup>25</sup>Ekambaka- bo batoka linde, bakanya Simona, buto aKulene, ono ambaka atofowa ta bilanga, bakata Lieka linde atolé mbisa iya Yesu.<sup>26</sup>Likama lifi li baito likambaka otuta ye, la bataali beke bakaumaka bokuku lo lelo ye,<sup>27</sup>la Yesu akamoila bataali akabeka: Bataalia ba Yelusaleme, oilelekeni, kola ongoma lelakai loka lino la bana bino aleko.<sup>28</sup>Loka mbo ta basiyo batoya oko etobeka baito mbo: Limengo la baito baitaka bokota, la bataali baitakabota ta wenda, la beke baitaka mwesaka bana!<sup>29</sup>La mbisa bambo bekaka la fongo ififi mbo: Ukowaka lisoo! La tofongongo tokikelike mbo: Ufeke'su!<sup>30</sup>Loka mbo kamba otokelai ndjaso yeke ta isandu iyese, ini ase ndjaso itotomowa ta tosandu chweke to'omeli?<sup>31</sup>Baito basiya baele, baito babe, bakaosa bo linde eseke lomoi loka baitomo.<sup>32</sup>La oko ekomaka bo ta eseke lotomu yuwa ii bochwe, baka'umela ye ta lieka onga, la beke babe, amoi ta boo bolome, la asiya ta boo bo boali.<sup>33</sup>Yesu loko akabeka mbo: Afa, mesileka bo loka mbo bailuwi yeke itokela bo. Baka'ana tulu inde la lokuso tokpelo.<sup>34</sup>Likama li baito baemalaka lomoilo la ani bekota bee Bayuda batoseka ye mbo: Auwisaka basiya, ongoma kamba ye ambe Kilisito aya Mungu, botchakolomu, auwiseke ye angene loko!<sup>35</sup>Basola loko bakaseka ye, la akaya ambe la bakaila ye baana balikase la iboli,<sup>36</sup>la baka beka mbo: Kamba owe Bokota bo Bayuda, uwisomoko owe angene loko!<sup>37</sup>Lisonomu li lombao li likolo linde likasonomo mbo: ONO BOKOTA BO BAYUDA.<sup>38</sup>Amoi a baito babe beke bakatomoko linde ta lieka akaiyola ye mbo: Tingowe ndjo Kilisito? Uwisomoko loko owe angene, la liso!<sup>39</sup>Kola ongoma ono moi akamamila ye mbo: Owe oito banga anga Mungu, eke embewe la lichanelo la bofono bomoi?<sup>40</sup>La momongo esu toengani la mbeko ikakeleke'su; la ono eke aikeli lobeko anga lomoi lobe.<sup>41</sup>Akabeka loko mbo: Yesu, oko embokomoko we ta vokota wao, enyelisekei.<sup>42</sup>Akabeka linde mbo: Lo'obeka lao wewe mbo, laboni otomba lange eseke lomoi aiteni ii paladizo.<sup>43</sup>La alo imbaka koni tina tina ee mbile ee liambe, la litutu likaufa wenda kola mbile ee libwa,<sup>44</sup>lowa lokaka, la tulu efiefi ee mbele Mungu eka faama ngambo ye.<sup>45</sup>Yesu akamama la limiki li bofoka mbo: Afa, lototika liwawi liange ta baoo bao. Esilaka ye lobeko ongoma, akangba.<sup>46</sup>Oko enaka bokota bo basola yeke itomoi, akainoisela Mungu kekeleke mbo: La momongo buto ono ambe buto akosi bobe!<sup>47</sup>Likama li baito batotina beke bangalaka eseke lomoi loka lo'omoila ndjaso yamo, bakaena ndjaso itomoi, la bakainowa ta boki la loumo bokuku wibo.<sup>48</sup>Baluwani la Yesu batotina, la bataali beke batutaka ye ta Galilaya, bakaemala esika la bakaena ndjaso.<sup>49</sup>Botolome amoi akaya, lina linde Yosefu, buto a beimo, bolome bolo bo liengani.<sup>50</sup>Ono aiti'imila lisangi li bakuwa bibo ye ambaka buto a Alimata, boki bomoi bo Bayuda, ono

ambaka lomoilelo bokota boya Mungu.<sup>52</sup>Ye akaka ambe Pilato lolengilo bindo biya Yesu.<sup>53</sup>Akauluwisa boliyo, la akaufaka bindo likulu la tulu efufu, la akata bio ta likemba libushomoko ta litale, elo buto ango amoi aiteitomo elo felo.<sup>54</sup>Imbaka lisiyo li likomanyi li Sabata e'enganaka la lowa.<sup>55</sup>Bataali beke bakafowa ta Galilaya la Yesu ndole emoi, bakatuta, la bakaena mbila la kanda emoi boliyo winde botomu onga.<sup>56</sup>Bakainowa la bakakomanya bieka bi liesa, la malasi. Lisiyo li Sabata bakatchwa liena, kee ani ebekaka ekela.

## 24

<sup>1</sup>Ta Sabata bakangala se kanda ebekomoko baoui, la oko e'andjaka ningo loeneno ta lisiyo li yenga bakaya ta mbila, la bakaila bieka bi liesa bieke bikomanyaka bo. <sup>2</sup>Baka'osha litale likaosila olikolamana ta boinda bo likemba, <sup>3</sup>la bakaota elo munga, la ongoma baikaena boliyo boya Ngene Yesu. <sup>4</sup>Embaka bo loenyekelo ta litina li lobeko lamo, batolome baele baka'emala la tulu ii liangangi. <sup>5</sup>Ongoma bataali bakamba la bowa likama, la baka'inya bembo bibo ta nyele. Batolome bamo baka beka libo mbo: Otolukai buto a liwawi ta bangbei loka lo ingi? <sup>6</sup>Aiti eke, la ongoma aofowa ta nyele. Enyelakai kanda ebekaka ye lino oko al ani embaka ye ta Galilaya, <sup>7</sup>imbo iengani la Wana a Buto lofomo ta bao ba baito babe lo loliliso ta lieka ongoma ta lisiyo li basaso afowe ta nyele. <sup>8</sup>La bakaenyela baoui binde lisiya, <sup>9</sup>ongoma bakafowa ta mbila loinowo ta boki, la bakabeisa ndjaso yamo ta baeki binde liou la amoi, la baito batotina. <sup>10</sup>Bataali bamo imbaka Maliya Magadala; la Yoana, la Maliya inago aya Yakobo; bataali basiya libo eseke lomoi bakabeisa baeki binde ndjaso yamo. <sup>11</sup>Ongoma ndjaso yeke iyenenaka libo kanda emoi lobeko-beko, la baofeka loimilo. <sup>12</sup>Ongoma Petelo akaemala, la akaka mangu ta mbila. Akainyama, la akaena ango tulu ifufu yo angene. Akainowa la akamwala aiteni ii yamo ikatomowa. <sup>13</sup>Ta lisiyo liamo aleko, baele bibo bambaka aleko ta boki bosiya esika la Yelusaleme kilometele tuku liambe, lina li boki wamo Emauwa. <sup>14</sup>Bakamba lotekelano mboli la litina li ndjaso yeke itotina ikaosila otomowa. <sup>15</sup>Embaka bo lotomboli la loiyolano, Yesu ye angene aleko akaya ambe bo, la akakenda libo ndole emoi; <sup>16</sup>la baiso bibo bakafelomo mbo, bailuwaka ye. <sup>17</sup>Akabeka libo mbo: Ini ndjaso itote'nu mboli ta lokendo? Bakaemala la bembo be ngandi. <sup>18</sup>Kola ongoma amoi ibo, lina linde Kelopoa, akabeka linde mbo: Kowe angene ombe boenda ta Yelusaleme, ono aluwi ndjaso yeke ikatomowa ta basiyu beke? <sup>19</sup>Akabeka libo mbo: Ini ndjaso? BO aleko bakabeka mbo: Ndjaso loka lo litina liya Yesu a Nasaleta, ono ambaka bonangoli bo bofoka la bakuwa la baoui ta baiso baya Mungu la baito batotina. <sup>20</sup>Bakanga ifi la bekota biso ba'anyi ye loka lo litchanelo li lingba, la bakata ye la lieka. <sup>21</sup>Esu ndjo tombaka otela botema mbo ye buto akoluka ofoya Isalaele ta bobo. La loka lo loko la likolo liye itotina, la laboni imbe lisiyo libasaso mbisa ii ndjaso yeke. <sup>22</sup>La ongoma bataali basiya aiteni iso baomwalise'su. Bakeli elo ta mbila nongo nongo aleko. <sup>23</sup>La baikaena boliyo winde, ongoma bakainowa la bakabeka mbo basiena lienesi li balikitomo beke bakabeka mbo ambe la liwawi. <sup>24</sup>Bamoi ta baito biso aleko bakeli elo ta mbila. Ba'oshi aleko kanda emoi la bataali bee bakeli, la ongoma loka loya Yesu, baka'osha ye. <sup>25</sup>Ye akabeka libo mbo: Enu baito bakosi bieli! BAito baisami bakuwa ta bawawi aleko loimilo ndjaso itotina ikabeka banangoli! <sup>26</sup>Kilisito aikaengana koni oena bomusi ta mbeko itotina felo iyota ta talaa inde? <sup>27</sup>Ko'akola ta lokasa loya Mose la oetela ta ye ii benangoli, Yesu akabeisa bo ta tasiyo tototina. <sup>28</sup>Ta mbilele bakomaka tina la boki weke batoka, akamba la yeme iyoka. <sup>29</sup>La felo akaunda bo likama akabeka libo: Tikalakai lange; tene, lisiyo lioka la likolase liomba tina. Akaota la mbele loka longala libo. <sup>30</sup>Akangala ta mesa libo, akaosa bokati, mbisa iyoutchela, aka'ana la akafa libo. <sup>31</sup>Baiso bibo bakalikolomo, la bakaluwa la onga, akalimowa felo ibo. <sup>32</sup>Bakabekana bamoi ta basiya mbo: Toiyoki kee imbé imoi ta botema wiso ta mbile atobekela'su ta ndole la atoanise'su tosiyo? <sup>33</sup>Bakaemala kota mbile amo la bakabinowa ta Yelusaleme. Bakaosha bo liou la emoi bambé eseke lomoi la kendisani libo. <sup>34</sup>Bakabeka libo mbo: Ngene aofufuka omongo, la akaenena la Simona. <sup>35</sup>La baeki baele bakabeka aleko yeke ikaomelaka bo ta ndole la ani baluwaka Yesu ta mbile eyanaka ye bokati. <sup>36</sup>Ta mbile batobekana bo'angene ongoma, Yesu ye'angeneakaemala aiteni ibo la akabeka libo mbo: Tikaka kimia embe lino! <sup>37</sup>Bakamba la bowa la lobilimo, otanga kembo bafoena bolimo bobo. <sup>38</sup>Loka loingi ombei la baenyeli? Loka loingi betema bino bewali la fiye? <sup>39</sup>Moilakai bao bange la bakolo bange, la luwakai mbo imbe ei. Undekeni la moilakai! Loka bolimo boiti la bindo la yuwa. La otoenai la weli mbo lombe lawo. <sup>40</sup>Ebekelaka ye bo ongoma, akaenisa bo bao binde la bakolo binde. <sup>41</sup>Bakambaka la liomali lieke baikambaka ango la liimeli la bakatikala ta limwali. La akaiyola bo mbo: Ombei la leka lo'olaa? <sup>42</sup>Bakaenisa ye ekende lo suwe lofoambe. <sup>43</sup>Akaosa la akala ta baiso bibo. <sup>44</sup>La akabeka libo: Tene ani lobekaka lino ani lombaka lino: "Iyengani oenganisomo itotina yeke isomomu ta ekela loya Mose, ta benangoli, la ta be'ele"<sup>45</sup>La onga, akalikola bo weli loka baluwe tosiyo. <sup>46</sup>Akabeka libo mbo: Enakai, tosiyo totoekisa mbo Masiya atoena bomusi, atofufuka lisiyo liyasaso. <sup>47</sup>La batobekela loka linde befindi betotina, owakola ta Yelusaleme, baangani okikowa loka baosho limesilomu li bobo wibo. <sup>48</sup>Ombei babekeli iyo mbeko. <sup>49</sup>Loka lange, lototoma kaniakni yeke Afa alakaka'enu. La enu eikalakai eke ta we boki bofi, kota ani otowalisomoi la bofoka bo likolo. <sup>50</sup>La mbisa akatola bo lousa lo boki bofi tinatina la Betaniya la, akaila bao binde likolo, akautchela bo. <sup>51</sup>Mbile autchelaka bo, akatika bo la akailomo ta lobola. <sup>52</sup>Loka libo, mbisa iyokuwamela ye, bakabinowa ta Yelusaleme, ani botema bowali la liomali. <sup>53</sup>La bakaoshamana ta mbile amo ta aiteni ii esondjamelu ani batosimola Mungu.